

Gui'ch yaloj par ree bén Corinto 1:1 i Gui'ch yaloj par ree bén Corinto 1:9

Gui'ch yaloj ni guxhaal San Pabl loj ree bén Corinto rliladx Jesucrist

Rxhiaal Pab xtiidx Dios

¹ Naj Pab, Dios bacaabee naj gacan tijb xi apóstol Jesucrist. Za' Sóstenes guie con naj, bén rliladx Jesucrist. ² Caxhalan gui'ch guie par läjt najdi bén rliladx xtiidx Dios luguiedx Corinto, läjt guial ma nayadi delant loj Dios por Jesucrist, abi' ma bacaabee Dios läjt gaquidi xbejnman bacaabee tēéman gra ree bén gra lad bén rliladx ree Jesucrist, bén naj Dad par dunuj ree né par laa reeman. ³ Dux Dad ree Dios né Dad Jesucrist güünle' läjt, yabe'cdxe tēé reeman luxdoodi.

Rudëed Pab quixtéé loj Dios

⁴ Gra dxejczi rudëdan quixtéé loj Dios por läjt zi'c ma gognéman läjt guial rliladxidi Jesucrist. ⁵ Në guial najdi tijbzzi con Jesucrist däd ma gogné Dios läjt, baneeman läjt quiargueijn din guinieedi chignia' teedi xtiidxaman. ⁶ Zian rguien guial diidxli naj ni ma biguejndi por Cristo diizd chi guzuloj bililadxidi laaman. ⁷ Abi' zianczi rajpidi xyudar Dios la'tgaj rbëzidi dxej ni gui't Jesucrist zatijb. ⁸ Abi' Dios gagné läjt din sudxi'chidi guidiblagaa loj ni rliladxidi laaman, chitëé xhie xtolidi chu' dxej ni gui't dux Dad ree Jesucrist zatijb. ⁹ Din Dios diidxli rüjn xtiidxaman cumplid, abi' laaman

Gui'ch yaloj par ree bén Corinto 1:10ii Gui'ch yaloj par ree bén Corinto 1:19

naj bén gule läjt din gaquidi tijbzi con dux Dad ree Jesucrist.

Ad rayalt la' lasa' ree xbejn Jesucrist

¹⁰ Compniar raliduladx ree Jesucrist, rniaaban lojdi por Jesucrist din guidxag c wedi, ad gaquidi tio'p lala', tijbzi gol gojc, tijbzi xgab gol been. ¹¹ Rnin lojdi zian compniar raliduladx ree Jesucrist, din ma gogbeen guial yu' wadijl entr läjt, zian bagojn ree xfamil Cloé naj. ¹² Guial garent garen rëb ree bejn, yu' reeman rëb: "Naj naj xbejn Pab", yu' tëë reeman rëb: "Naj naj xbejn Apolos", yu' reeman rëb: "Naj naj xbejn Bëd", yu' tëë reeman rëb: "Naj naj xbejn Cristo." ¹³ Per naj rni lojdi guial Cristo tijbzi najman, din ad najt güt loj crüjz por läjt, ad gurobnijs tëetidi par gaquidi da bejnan. ¹⁴ Quixtéë Dios chi wan ladxidi achut mazri barobnijsan, Crispozi né Gayo. ¹⁵ Chiteëë guiébidi guial gurobnijsidi par gaquidi da bejnan. ¹⁶ Barobnijs tëen xfamil Estéfanás, per ad rusaadaladxtran chu mazri barobnijsan. ¹⁷ Din ad guxhaalt Cristo naj par gurobnijsan bejn ree, guxhaalaman naj par gatie'chan diidx xhienaa gap bejn perdon loj Dios. Ad cane tëetan con diidx ni yadxaloj ree bejn naj luar cu'guijc reeman par xhie güjt Cristo loj crüjz.

Xguialrniabee Dios né xquiarguejnman

¹⁸ Gra ni raguie'ch ree guial por xhie güjt Cristo loj crüjz, achet lasajcan par ree bén zë loj nejz mal. Per par dunuj ree guial ma raya'p ree perdon, dád lasajc xguialgüjtaman din zian rayagbee ree xhienaa naj xguialrniabee Dios. ¹⁹ Abi' loj xtiidx Dios rëb:

Gui'ch yaloj par ree bén Corinto 1:20iii Gui'ch yaloj par ree bén Corinto 1:26

Gunijtan xquiargueijn ree bén ni rëb guial rajc da't
reeman,
abi' guscajyan xquiargueijn ree bén ni rëb guial
rignia' da't reeman.

²⁰ Yan, ¿con ree bén rëb guial rajc da't reeman?
¿Con ree mextr rajc ley? ¿Con ree bén rëb guial rajc
da't reeman xcwent ree ni yu' loj guidxliuj? Par
Dios achet lasajc xquiargueijn benguidxliuj. ²¹ Abi'
por xquiargueijn Dios ragbeechaawaman guial ad
zayünbeet benguidxliuj laaman por xquiargueijn
reeman, zeel beenman xgab yabëëman bejn loj
casti por xtiidxaman ni caylüün bejn ree. Abi'
ree bén yarii loj casti guin laa reeman naj bén
rliladx laaman, majsi par ree ben ren achet lasajc
ni canin por Cristo.

²² Din bén Israel ree rën reeman guguiaa ree-
man milagr din chililadx reeman, abi' ree bén ad
najt bén Israel rën reeman guien reeman ni mazri
nawëëg din chililadx reeman. ²³ Per dunujn ni
caylüün bejn ree naj par xhie güjt Cristo loj crüjz,
abi' ree bén Israel rdxe'ch reeman, guiáad par ree
bén ad najt bén Israel achet sirv rüjn ni caylüün.
²⁴ Per par ree bén ma bacaabee Dios, zi'c ree bén
Israel zi'c ree bén ad najt bén Israel, por Cristo
rguien xguialrniabee Dios nö xquiarguejnman.
²⁵ Din ni rulüü achet lasajc guial ni rüjn Dios, laan
naj ni mazri lasajc loj xguialrajc benguidxliuj. Abi'
xt ni bigra xguialrniabee Dios laan naj ni mazri
lasajc loj xguialrniabee benguidxliuj. ²⁶ Gol gogbee
compiiar raliduladx ree Jesucrist guial ta'nzi ree
bén rliladx laaman naj bén rignia' zi'c naladx ree
benguidxliuj, ta'nzi ree bén rliladx laaman rajp
guialrniabee loj guidxliuj guie, abi' ta'nzi ree bén

Gui'ch yaloj par ree bén Corinto 1:27 iv Gui'ch yaloj par ree bén Corinto 2:4

rliladx laaman naj ree bén za loj ree famil ni naj bén zojbloj. ²⁷ Abi' Dios gulej ree bén ni naladx ree bejn ad rajcza'ct din yaya'nxtu ree bén rajc da't, gulej téeeman bén ad ca't ree guialrniabee din yaya'nxtu ree bén ca' guialrniabee. ²⁸ Dios gule ree bén ni naladx ree bejn guial achet sirv laa reeman, bén ni naladx ree bejn guial achet lasajc reeman, bén ni achut naj loj guidxliuj guie din chiquiedaman xguialdxal ree bén naj ree chunin loj guidxliuj guie. ²⁹ Zianan zeel achut zajc güün benro' delant loj Dios. ³⁰ Yan por Dios ma najdi tibzzi con Jesucrist, dxel por laaman rtia'di xguialrajc Dios. Abi' guial raliduladx ree Jesucrist ad zayaltri ree casti, por laaman ma naya ree, naya jc tée ree par laaman abi' ma raya'p ree perdon loj Dios. ³¹ Zianan din gac zi'c rëb loj xtiidx Dios lod rëb: "Bal yu' bén rën guilies xvalor gajc, luar güündi zian gol gules xvalor dux Dad ree Jesucrist."

2

Xtiidx Jesucrist bén cwa loj crüjz

¹ Compiiar raliduladx ree Jesucrist läjt ragbee guial chi wan ladxidi, chi gunen xtiidx Dios lojdi, ad gunetan lojdi con ree diidx nabee o con ree diidx nawëég par chignia'di. ² La'tgaj guzun con läjt ad gunetan diidx ren ree lojdi, tibzzi xcwent Jesucrist bén cwa loj crüjz. ³ Abi' chi wan ladxidi zi'c tibzzi bén ni ad yu't gojl, rnijczan guial rdxeban bialan lojdi. ⁴ Në chi gunenë'n läjt, chi gunen xtiidx Dios lojdi, ad gunenë'tan läjt con ree diidx ni

[Gui'ch yaloj par ree bén Corinto 2:5 v](#) [Gui'ch yaloj par ree bén Corinto 2:12](#)

günan läjt gan por da diidxan, benan gan rliladxidi Jesucrist por xyudar xSprijt Dios nē xguialrniabeeman. ⁵ Din guiguien guial ni rliladxidi Jesucrist zëédan por xguialrniabee Dios ad por xguialrajct bénguidxliuj.

Por xSprijt Dios nünbee bejn laaman

⁶ Majsi chi ralüün bén ni ma rajc ree mazri xtiidx Dios, ralüün laa reeman por guialrajc. Per ad por guialrajct ni yu' loj guidxliuj guie, lasa' guialrajc ni rajp ree bén rniabee, guialrajc ni yu' dxej nit.

⁷ Ralüün laa reeman por guialrajc ni zëéd por Dios, din yanee ree zi'c naj xixgab Dios, xgab ni goc ni naguie'ch par ree bénguidxliuj, abi' xgab guin naj guial chililadx reeman Jesucrist, diizzd chi gad guidxliuj gacchaaw been Dios xgab guin din gac yayal ree xanyabaa. ⁸ Laan naj tijb ni ad gogbeet ree bén rniabee loj guidxliuj guie, din bal niagbee reeman dxel ad nucaat reeman dux Dad ree Jesucrist loj crüjz, bén ca' guialrniabee. ⁹ Per loj xtiidx Dios rëb:

Achut waguiiaa, achu tëët waguijejn
abi' ni'quid wayüjnt bénguidxliuj xgab
por ni nagu'chaaw Dios par ree bén rën laaman.

¹⁰ Per dunuj ree ma balüü Diosan duloj ree por xSprijtaman bén naban con dunuj ree, din xSprijt Dios gran ragbeeman, xt ni mazri naguie'ch ni zëéd por Dios.

¹¹ Achut ragbee xhie xgab cayüjn tijb bejn. Xsprijtsaman ragbee xhie xgab cayüjnman. Ziangajc xSprijt Dios tijbzi laaman ragbee xhienaaq naj xixgab Dios. ¹² Abi' dunuj ree guial ma zunaal ree xnejz Dios, ad nabajnt ree con tijb sprijt ni zëéd

[Gui'ch yaloj par ree bén Corinto 2:13](#) vi [Gui'ch yaloj par ree bén Corinto 3:3](#)

loj guidxliuj guie, ma nabajn ree con Sprijt zëéd loj Dios, din por xSprijt Dios yayagbee ree gra ni ma bazaladx Dios duloj ree guial najman benza'c.
[13](#) Abi' laa reen naj ni caylüün bejn ree, per ad por dux quiarguijejntan, xSprijt Dios culüü dunujn xhienaag yanen. Zian ralüün xcwent Dios bén ma nabanné xSprijtaman.

[14](#) Per bén ad nabannét xSprijt Dios ad rliladx-taman ni zëéd ree por Dios ni rulüü xSprijt Dios dunuj ree, din par laaman najn tijb ni ad rüjnt sirv. Zeel ad zajct chignia'man xcwent Dios din con xSprijtzi Dios zajc chignia' bejn ni rën guiëban.
[15](#) Per bén ma nabanné xSprijt Dios por Sprijt guin rignia'man ni naj xcwent Dios, abi' ni'qui tijb ree bén ad nabannét xSprijt Dios ad rignia't checx zeel rignia'man ni guin ree. [16](#) Loj xtiidx Dios rëb: “¿Chu ma bignia' xixgab Dios? ¿Chu zajc gulüü Dios ni güünman?” Per dunuj ree, naj dux xgab ree zi'c xixgab Cristo.

3

Compniar rüjn ree sirv loj Dios

[1](#) Compniar raliduladx ree Jesucrist, chi guzun con lëjt ad gunenë'tan lëjt zi'c ree bén ma nabanné xSprijt Dios, gunenë'n lëjt zi'c ree bén ad nabannét xSprijt Dios, zi'c ree bén qui guzulojri rliladx Jesucrist. [2](#) Diidx ad nawëëgt ree gunenë'n lëjt zi'c rudëë bejn lejch loj tijb xindobéz guial xo gawix ni raw bengol, zian gunenë'n lëjt diidx ad nawëëgt ree. Abi' ni'qui yan ad zile't ganenë'n lëjt zi'c ree bén ma rignia' mazri xtiidx Dios. [3](#) Din sta nabandi zi'c naban gra ree bénguidxliuj. Nadëdloj lasa'di rdil

Gui'ch yaloj par ree bén Corinto 3:4vii Gui'ch yaloj par ree bén Corinto 3:12

tëëdi, zian rguien guial sta nabandi zi'c gra ree béguidxliuj bén ad zinalt ree xnejz Dios. ⁴ Din chi rëbidi: “Naj naj xbejn Pab”, o chi rëbidi ya: “Naj naj xbejn Apolos”, zian rguien guial sta cayündi zi'cgajc chutëëz béguidxliuj.

⁵ Per naj rni lëjt: ¿Chu naj Pab o chu naj Apolos? Gol gogbee guial nayajczan tio'p ree bén cayüjn sirv loj Dios persi bile' bililadxidi tijb gajc dunujn cayguieen dxiin ni banee Dios dunujn. ⁶ Yaguie'ch ree guial naj naj zi'c bén rxübin abi' Apolos naj bén rguiil, per por Dios cayagbeedi mazri xtiidxaman zi'c rusni'saman tijb cwaandoo. ⁷ Abi' zi'c bén rxübin zi'c bén caguiil mandadzi cayüjn reeman, Diosan naj bén ni rusni's ni rxübin reeman. ⁸ Yan ziangajc naj con Apolos tijbz mandad cayguieenan, rayagbeen guial zunee Dios dunujn ni rayalan bal xhienaaag yaguieenan mandad ni baneeman yaguieen tijb gaj dunujn. ⁹ Zeel naj con Apolos nayajcan compniar cayguieenan xmandad Dios.

Yaguie'ch ree lëjt naj xguiniaas Dios lod cayguieenan dxiin o lëjt naj zi'c tijb yu ni cayüjn Dios. ¹⁰ Abi' naj guial catiechan xtiidxaman najn zi'c tijb albanil bén ni rajp da't ciudad din grii xchiinman zagdxe guial bacaabeeman naj günan xcimiant yu guin. Abi' ree bén ni cusnuu culüü xtiidx Dios, laa reeman naj zi'c bén cusnuu cayüjn yu guin. Per rayal gap reeman ciudad xhienaaag cales reeman yu guin, ¹¹ din achut zajc guchaa cimiant ni ma benan, abi' cimiant guin naj guial rliladx Jesucrist. ¹² Abi' ree bén ni cayguie'ch ree naj ree bén ni cusnuu cales yu loj cimiant ni cayguie'ch ree naj guialrliladx Jesucrist, bal

Gui'ch yaloj par ree bén Corinto 3:13viii Gui'ch yaloj par ree bén Corinto 3:23

cayüjn reeman laan con or o con plajt o con
ree guiaj zaghx o con yag o con biqui o con
balagya'. ¹³ Per chi guidxin dxej ni güün Dios
xguialguxtisaman, dxel guiguien xhienaag naj
xchiin reeman. Din dxej guin gac zi'c chi rajc
prueb xhienin loj guij din guiguien xchiin tijb
gaj bejn. ¹⁴ Abi' bal rüjn sirv ni beenman zi'c
tijb bén ni ruzoob tijb yu ni ad re'ct, zaca'man ni
rayalaman por ni beenman. ¹⁵ Per bal che'c ni
beenman, sacaman zi'c tijb bén ni re'c lidz abi'
penz rliaaman loj bajl, din zajcaman perdon per
guséëbaman gra.

¹⁶ Zeel gol gogbee guial lëjt naj zi'c tijb xyadoo
Dios guial nabandi con xSprijt Dios. ¹⁷ Abi' bal
chu bén guite'chdojn bén rliladx ree Jesucrist,
zunidloj Dios laaman guial ruse'nman xyadoo na-
gle'man ni canin naj lëjt guial najdi xbejnman.

¹⁸ Ad gusquiee lëjt gajc. Bal yu' tijbidi naladx
guial rajc da'tidi guial loj ree bejn, zaghxeli gol
been naya din gaquidi diidxli bénrajc da't. ¹⁹ Din
delant loj Dios achet lasajc guialrajc benguidxiuj,
tib lajt loj xtiidxaman rëb: "Ad rudëët Dios mod
grii zaghx o ni naj xixgab ree bén naladx guial
dád nasin reeman par güün reeman tijb ni ad
najt xnejz." ²⁰ Rëb tée loj xtiidxaman: "Dios
ragbeechaaw guial xixgab ree bén rajc da't achet
lasajcan." ²¹ Zeel ad rayalt chu guilie xvalor gajc
guial najman xbejn tijb bejn o stijb bejn. Din
xieendi ma naj gra. ²² Ma nulendi dunujn, naj Pab,
Apolos në Bëd. Xieendi naj guidxiuj, guialnaban,
guialgüjt, ni yu', në ni qui chu'ri, xieendi naj gra.
²³ Abi' lëjt ma najdi xbejn Cristo abi' Cristo naj Xi'n

Gui'ch yaloj par ree bén Corinto 4:1 ix Gui'ch yaloj par ree bén Corinto 4:8

Dios.

4

Dxiin ni been ree bén naj ree xi apóstoles Jesús

¹ Gol baguiaa dunujn zi'ctzi xmojs Cristo par yasiidan bejn ree xhienaaq naj xixgab Dios, xgab ni naguie'ch par bejn. ² Per lëjt ragbee guial tijb mojs naj par güünman gra ni rayal güünman din gap reeman laaman confianz. ³ Zeel ad rutan xgab bal xhienaaq ruguiaadi naj o bal xhienaaq ruguiaa ree guxtis naj, din ni'qui naj ad zajct ganin xhienaaq najn. ⁴ Din majsí bal naladxan guial achet ni mal wayünan per ad por ziant ma ganin guial achet da faltan niz loj Dios, tijbzi dux Dad ree Jesucrist ragbee xhienaaq cayünan. ⁵ Zeel ad rayalt yadxa lojdi chu cayüjn zagdxe o chu ad cayüjnt zagdxe, gol basa'n ree ni guin par dxej ni gui't Dad Jesucrist. Laaman gusguien conin naj diidxli, o bal wali ree baguieen ree xmandadaman guidib du luxdoo ree, dxej guin yayagbee ree xhie diidxza'c guiniee Dios por tijb gaj dunuj ree.

⁶ Compiiar raliduladx ree Jesucrist, gra ree ni canin lëjt wen par lëjtan. Abi' Apolos con naj nayajcan tijb ejempl par lëjt, din por dunujn gusi-ididi ad tëdlaj guiliedidi xvalor bejn chitëë por zian gusa'ndi trajs stijb bejn. ⁷ Din ni'qui tijb bejn ad lasajct mazri loj stijb bejn. ¿O xhie rajpidi ni ad baneet Dios lojdi? Abi' bal por laaman rajpidi ni rajpidi, ¿chexc zeel rlies xvalorgajquidi zi'c rulüü ad por Diost rajpidi laan?

⁸ Lëjt naladxidi achet ryaadxidi, guial ma bayaaloj rignia'di abi' ad ryaadxtridi dunujn. Abi' naladxidi najdi zi'c ree rey. ¡Per xinix niajquidi

[Gui'ch yaloj par ree bén Corinto 4:9](#) x [Gui'ch yaloj par ree bén Corinto 4:17](#)

rey din nanabeen con läjt! ⁹ Yu' dxej naladxan guial dunujn nayajcan xi apóstoles Jesús, Dios basial dunujn yayajcan zi'c ree bén ad lasajct, zi'c ree benmal ni rayal guialgüjt, abi' radxaloj ree anjl në ree béguidxliuj dunujn. ¹⁰ Abi' la'tgaj nayajcan zi'c ree bén ad yu't xquiarguejn par béguidxliuj guial ratie'chan xtiidxza'c Cristo, läjt rlies xvaloridi guial rignia' da'tidi guial rliladxidi laaman. Dunujn nayajc zi'c bén ad yu't gojl guiáad läjt naladxidi yu' da'tidi gojl abi' rajp ree bejn läjt respejt guiáad dunujn ad rënt reeman dunujn. ¹¹ Xt yandxej sta cayzaagdiajn por guialrliaan, guial re'c nijs në guial ryaadx du xaban. Zienloj ni rüjnnë ree bejn dunujn, achet du lidxan. ¹² Abi' dád radxagan raguieenan dxiin din guidxel ni yadaawan. Chi ruzaal ree bejn diidxmal du guijcan radxi'nan con diidxza'c, abi' radaanan ni rüjnnëtzi reeman dunujn. ¹³ Abi' chi rnieceguijdx reeman dunujn, raneeza'cnë'n laa reeman. Xt yan nayajcan zi'c tijb guix par béguidxliuj, nayajcan zi'c tijb ni ad rüjnt sirv par laa reeman. ¹⁴ Ad cucatan gui'ch guie par gusa'nxtun läjt, cukan laan din gunen läjt consejw zi'cgajc da xi'n reen guial rënan läjt. ¹⁵ Din majsi gapidi zi'c chii mil ree bén gusiid läjt, per najzi naj zi'c tijb Dad par läjt. Din por naj guzuloj rliladxidi Jesucrist chi basidan läjt xtiidxza'caman. ¹⁶ Zeel rniaaban lojdi din guibandi zi'c nabanan.

¹⁷ Din par zian rxhialan Timoteo guitixloj-man läjt, bén rënan zi'c da xi'nan laaman diidxli rliladxaman Jesucrist. Laaman gusaaladx läjt xhienaag nabanan guial rliladxan Jesucrist, din

Gui'ch yaloj par ree bén Corinto 4:18 xi Gui'ch yaloj par ree bén Corinto 5:6

zi'c nabanan naj ni cusidan bén rliladx ree Jesucrist gra lod ran. ¹⁸ Yu' ree xcompniaridi naladx guial ad zitixlotran läjt abi' rlies xvalor reeman guial naban reeman zagdxe. ¹⁹ Per Dios gunee permis din diob guitixlon läjt dxel gagbeen wali reeman ya naban reeman zi'c rniecee reeman o rniecez reeman. ²⁰ Din guial guiban zi'c rniabee Dios ad najtan diidxzi, rayal güün bejn zi'c rniabee Dios con xguialrniabeeman. ²¹ Yan, ¿conin rëndi günan chi guitixlon läjt, gadilë'n läjt ya o guiënan läjt ganenë'n läjt diidxza'c?

5

Xhienaaag gac con bén rüjn tijb dol

¹ Ma bacagdiagan guial tijb läjt bén rliladx ree Jesucrist nabannë xnarojpidi zi'c lacheelidi, ni'quiza ree bén ad nünbeet Dios ad rüjnt lasa' dol guin. ² Abi' läjt rüjndi benro', luar rüjndi benro' gol guyunaya gol babëë töö bén guin lojdi. ³ Majsi ad za'tan con läjt, per rünan xgab por läjt zi'cgajc rulüü za'n con läjt, abi' ma benchaawan xgab xhie rayal bén rüjn dol guin. ⁴ Zi'c guialrniabee ni banee Jesucrist naj, naj rni läjt: "Gol bachajg lasa'di." Dxel gol gunaladx guial za'n con läjt abi' por xguialrniabee Dad Jesucrist, ⁵ gol been bén guin tiblad, gol basa'nman loj xindxab din gagnaaman o sagdajman por ni cayüjnman din gacaman perdon dxej ni gui't dux Dad ree Jesucrist.

⁶ Ad nixtan guial rlies xvalorgajquidi abi' rtiëjbidi rajc lasa' ree dol guin. Gol gogbee guial zi'c rüjn levadur cob par guiadxtil ziangajc con tijb

Gui'ch yaloj par ree bén Corinto 5:7xii Gui'ch yaloj par ree bén Corinto 5:12-13

bén güün dol ma zë gajcan zian con gra ree lasa'di.
⁷ Zeel gol been naguiejn din gaquidi naya zi'c cob harin ni ad yu't levadur guijc. Din zi'c bagüjt ree bejn tijb xiil lanij pascw din yaya xtol reeman, ziangajc dunuj ree por xguialgüjt Jesucrist ma naya ree loj Dios. ⁸ Abi' guial yabaa ree por zian naj guial yabajn ree guidib du luxdoo ree zi'c rayal, zi'c guiadxtil ni ad no'cht levadur, luar yabajn ree con ree ni mal në ree dol zi'c babajn ree yaloj.

⁹ Abi' zi'c ma rnin lojdi loj stijb gui'ch ni ma guxhalan lojdi, ad guchajguidi bén naban ree nadxuudx. ¹⁰ Ad canené'tan lëjt zian por ree bén ad rliladxt Dios, bén naban ree nadxuudx o rzëébladx reeman ni ruguiaatzi reeman o naj reeman gubaan o rën reeman ni ren luar guiën reeman Dios, din bal zianan dxel ryaadx yariidi loj guidxliuj guie. ¹¹ Bén ni canin lëjt naj ree bén ni rëb naj ree xcompiariadi, bén rliladx ree Jesucrist abi' naban reeman nadxuudx, o rzëébladx reeman ni ruguiaatzi reeman, o rën reeman ni ren ree luar guiën reeman Dios, o rbëë reeman xtiidx bejn, o naj reeman bengu', o béngubaan. Xcompiariadi bén naban ree zian ni'quid rayalt gawnëdi laa reeman. ¹²⁻¹³ Ad da cwenttan naj ganen por ree bén ni ad najt dux compniar ree loj ni raliduladx ree Jesucrist bal rajp reeman dol o ad rajpt reeman dol, Dios naj bén güün guialguxtis con laa reeman, per dux cwent ree naj guial yazuxnejz ree bén naj ree dux compniar ree bén rliladx ree Jesucrist. Zeel gol babëë bén cayüjn dol entr lojdi.

6

Chi yu' wadijl entr ree bén rliladx Jesucrist

¹ Zi'c chi xhie rzajcnë tijb xcompniaridi bén rliladx Jesucrist, ¿chexc zeel rëjdi loj guxtis din yabëëxnejzaman ni rzajquidi luar chedi loj ree xcompniaridi bén rliladx ree Jesucrist? ² ¿Id rliladxidi ya guial yu' dxej bén rliladx ree Jesucrist laa reeman naj bén güün xguialguxtis loj ree bénguidxliuj? Abi' bal yu' dxej güün xguialguxtis reeman loj bénguidxliuj, ¿chexquiza zeel ni ad nawëëgt ni rzajc ree xcompniaridi ad rajct rabëëxnejzidi? ³ ¿Id ragbeedi ya guial xt loj ree xianjl Dios yu' dxej yaya'p ree guialrniabee? ¡Abi' xt mazri zile' yalëëxnejz ree ni cayza'c ree loj guidxliuj guie! ⁴ Zeel zi'c chi xhie rzajcnë lasa'di, ¿chexc zeel zëdi loj ree bén ad najt xbejn Cristo din yabëëxnejz reeman ni rzajquidi? ⁵ Canin lëjt ni guin ree din yatu lojdi. ¿Wen nid yu'czi tijb lëjt zajc yabëëxnejz ni rzajc lasa'di ya? ⁶ Per lëjt luar güündi zian aal rudëëd lasa'di loj ree bén ni ad rliladxt Dios.

⁷ Abi' natun guial gudëëd xcompniaridi loj guxtis guial cadilidi, mejorli gol gudaan ni rüjnnë reeman lëjt. Mejorli tiëbidi cuan reeman xieendi. ⁸ Per luar güündi zian, lëjtli cayüjn ree ni mal guin con ree xcompniaridi bén rliladx ree Jesucrist. Rtia'di xieen reeman abi' rüjnnëdi laa reeman ni ad rayalt güünnëdi laa reeman.

⁹ ¿Id ragbeedi ya guial bén naj ree benmal ad zut reeman loj xguialrniabee Dios? Gol gogbee guial loj xguialrniabee Dios ad zut ree bén ni nabán ree nadxuudx, në ree bén rën ree ni ad najt ree Dios,

Gui'ch yaloj par ree bén Corinto 6:10xiv Gui'ch yaloj par ree bén Corinto 6:17

në ree bén za'në bén ad najt lacheel reeman, në ree xinguaaw rüjn zi'c béngunaa në ree xin rën lasa' xinguaaw zi'c béngunaa. ¹⁰ Në ree bengubaan, në ree bén rzëébladx ni ruguaatzi reeman, në ree bengu' con ree bén rnieeguijdx bejn, në ree bén raguiil xhienaag chiquied reeman xieen bejn, ad zut reeman loj xguialrniabee Dios. ¹¹ Yu'di gubajn zian guia'xchej, per yan ma nayadi delant loj Dios, ma najdi par Dios, abi' ma nayabidi zi'c tijb bén ni ad wayüjnt dol por xguialrniabee Dad Jesucrist në por xSprijt Dios bén ma nabannëdi.

Dux cuerp ree naj par Dios

¹² Walican zajc yaguieen ree zi'ctzi rayën ree, per ad gratan naj zagdxe par güün bejn. Zajc günan zi'ctzi rënán, per ad zatiëëbtan xhie nabee naj. ¹³ Yu' ree bejn rëb: "Guialraw naj par lën bejn, abi' lën bejn naj par guialraw." Walican, per gunidloj Dios grop ree ni guin. Per ad walitan guial xcuerp bejn naj par güünman ni dxuudx ree con bén ad najt lacheelaman. Din dux cuerp ree naj par Dios, abi' laaman rniabee dux cuerp ree. ¹⁴ Dxel zi'c basban Dios dux Dad ree Jesucrist, ziangajc yasbanman dunuj ree por xguialrniabeeman.

¹⁵ Gol gogbee guial ma najdi tijbzí con Cristo, guial dux cuerp ree ma naj tiblia' xcuerpaman. ¿Wen yaca' ree xcuerp Cristo ya ni cayguie'ch ree naj dux cuerp ree par yunë' ree tijb béngunaa dxuudx? ¡Ad rayalt gac zian! ¹⁶ ¿Nid ragbeedi ya guial chi runë bejn tijb bén ni ad najt lacheelaman, dxel ma najman tijbzí con bendxuudx guin? Lëjt ragbee guial loj xtiidx Dios rëb: "Grop reeman ma naj tijbzí." ¹⁷ Per bén ni ma naj tijbzí con dux Dad

Gui'ch yaloj par ree bén Corinto 6:18xv Gui'ch yaloj par ree bén Corinto 7:5

ree Jesucrist, najman tijbzi con laaman por xSprijt Dios.

¹⁸ Gol gojp da't cudad ad güundi ni dxuudx ree con bén ad najt lacheelidi. Xhietëez dol ren ad ruxhiintan xcuerp bejn zi'c rxin xcuerpaman chi rünman ni dxuudx con bén ad najt lacheelaman. ¹⁹ Din gol gogbee guial läjt naj xyadoo xSprijt Dios bén ma baneeman lojdi, dxel zian zi'c ma nabandi con xSprijt Dios ad rniabeetri läjt gajc. ²⁰ Din par zian gudijx Jesucrist por dunuj ree chi gütaman loj crüjz. Zeel gol beenné xcuerpidi dxiin par güundi Dios bén zojbloj, din laaman naj bén rniabee läjt.

7

Consejw xcwent guialruxhliaa

¹ Yan, yadxin diidx xcwent ni gunabdiidxidi naj loj gui'ch ni guxhaalidi lon. Naj rni zagdxe naj guial ad zuxhliaat bejn. ² Per chitëe güün bejn dol con stijb bejn, zagdxen guial tijb gaj xinguaaw chu' lacheel o tijb gaj bengunaa chu' lacheel, ³ din gudëe xinguaaw guin gust lacheelix abi' bengunaa guin gudëëzaman gust lacheelaman. ⁴ Din chi ma baxhliaa tijb bengunaa ad laatraman rniabee xcuerp, xinguaaw guin naj xin rniabee laan. Ziangajc chi ma baxhliaa xinguaaw, ad rniabeetri xcuerpix, bengunaa guin ma rniabee laan. ⁵ Zeel xinguaaw né bengunaa ad rayalt gudxoон xcuerpidi loj lacheelidi. Per bal ma bedi diidx con lacheelidi guial ad zugaalt lasa'di tio'p choon dxej din cweedx guiniabidi Dios, zagdzen. Per chi ma gudëd ree dxej guin, gol bachajg lasa'di stijb chitëe güün xindxab läjt gan con ree xixgabidi.

Gui'ch yaloj par ree bén Corinto 7:6xvi Gui'ch yaloj par ree bén Corinto 7:15

6 Ad canitan lojdi guial najczi guxhliaa bejn, per ad ni maltan guial guxhliaadi. **7** Da xgaban naj guial xi nix gra ree bejn gac zi'c naj, per tijb gaj bejn ma bazaladx Dios xquiarguejnman guial xhienaa guibanman, bal guxhliaaman o bal id zuxhliaaman.

8 Par ree bén xtib n̄e par ree béngunaa bizëjb, naj rni guial zagdxeli yaya'n reeman zi'c naj. **9** Per bal id zadaan reeman guial ad zuxhliaat reeman, dxel zagdxeli guxhliaa reeman luar gudëëd xcuerp reeman casti guial taan reeman.

10 Guiáad ree bén ma baxhliaa, ad da diidxtanan ganin lojdi, xtiidx dux Dad ree Jesucristan guial ad zaro'nt béngunaa lacheelaman. **11** Per bal tio'n lacheelaman ad rayalt guxhliaanëman xin ren, zagdxeli naj yachajg lasa' reeman stib. Ziangajc xinguaaw ad najt yala' lacheelix.

12 Yan, ni ganin ad ni guneet dux Dad ree Jesucristan, per naj rni lojdi: Bal yu' xinguaaw rliladx Jesucrist abi' lacheelix ad rliladxt, abi' bal par béngunaa guin achet güünan, dxel ad najt yala' lasa' reex. **13** Ziangajc bal rliladx béngunaa guin abi' lacheelaman ad rliladxt, abi' bal par xinguaaw guin achet güünan, dxel ziangajc ad rayalt yala' reeman. **14** Din xinguaaw ni ad rliladxt Jesucrist, züjnle' Dios laax guial rliladx lacheelix. Guiáad béngunaa ni ad rliladxt Jesucrist züjnle' Dios laaman guial rliladx lacheelaman, zian güünle' Dios xi'n reex. Din bal id naj zian, ad nayabt xi'n reex loj Dios zi'c tijb bén ni ad wayüjnt dol. **15** Per bal xinguaaw o béngunaa ni ad rliladxt Jesucrist rënman yala' lacheelaman guial rliladx lacheelaman Jesucrist, yala'ri reeman. Bén rliladx ad zajct

Gui'ch yaloj par ree bén Corinto 7:16xvii Gui'ch yaloj par ree bén Corinto 7:24

güünman naguiejn guibannë lacheelaman laaman din ad gurejdxt Dios dunuj ree par yabajn ree con wadijl. ¹⁶ Din bengunaa guin ad ragbeetaman bal güünman gan chililadx lacheelaman, o bal xinguaaw guin ma rliladx dxel ni'qui laax ad ragbeet bal güünx gan chililadx lacheelix.

¹⁷ Naj rni guial tijbgaj ree bén ni ma rliladx Jesucrist rayal guiban reeman loj guidxliuj guie zi'c ma bacaabee Dios laa reeman, yaya'n reeman zi'ctzi naj reeman chi guzuloj rliladx reeman Jesucrist. Zianan naj ni cayën loj ree dux compniar ree bén rliladx ree Jesucrist güün reeman. ¹⁸ Bal tijb bejn chi guzuloj rliladxaman Jesucrist mal yu'man sen ni ru ree bén Israel, yaya'nraman zian. O bal id yu'man sen guin chi guzuloj bililadxaman Jesucrist, ad najt chu'man sen guin. ¹⁹ Din achet güünan bal yu' bejn sen guin o ad yu'taman sen guin, ni mazri lasajc naj guial güünman zi'c rniabee Dios. ²⁰ Zeel gol baya'n zi'c najdi chi guzuloj bililadxidi Jesucrist. ²¹ Bal najl zi'c bén nado' chi guzuloj bililadxil laaman, ad najtan ni chu'l xgab xhienaag güünl. Per bal zile' ad zajctril zi'c bén nado', mazri zagdxe barii loj ni najl zi'c bén nado' guin. ²² Bén ni naj zi'c bén nado' chi guzuloj bililadxaman Cristo ma najman zi'cgajc bén ni ad najt zi'c bén nado' par güünman sirv loj Cristo. Abi' bén ni ad najt zi'c bén nado' chi guzuloj bililadxaman Cristo, dxel Cristo ma rniabee laaman. ²³ Lëjt ragbee guial ma gudijx Jesucrist zro' por lëjt, yan ma najdi par Dios. Ad rayalt tiëbidi nabee ree benguidxliuj lëjt con ree ni rusquiee. ²⁴ Zeel rnin lojdi compniar ralidu-

[Gui'ch yaloj par ree bén Corinto 7:25](#)[xviii](#)[Gui'ch yaloj par ree bén Corinto 7:34](#)

ladx ree Jesucrist, gol bay'a'n zi'c najdi chi guzuloj bililadxidi Jesucrist.

[25](#) Yan läjt bén ad waxhliaat ree, dux Dad ree Jesucrist achet rëbaman por zian. Per naj zajc gunen läjt consejw xhienaaag güundi, abi' da xgaban naj guial zaliladxidi ni ganin lojdi din guial raya Dios naj bacaabeeman naj cayünan mandad ni cayünan. [26](#) Zeel naladxan guial zi'c naj tarbajw ni caydüüd ree yan, zagdxeli naj guial ad zuxhliaatidi. [27](#) Bén ni ma baxhliaa ad najt gusa'n lacheelaman. Guiáad bén ni ad waxhliaat ad rayalt güünman naguiejn guxhliaaman. [28](#) Per bal rüjnl xgab guxhliaal, ad dolt naj guxhliaal. Ziengajc ree biinxdebni rën guxhliaa, ad dolt naj guxhliaa reem. Per rugojnan läjt guial zienloj naj ni rzajc bén ruxhliaa, abi' laan ad rëntan saquidi.

[29](#) Ni rënan gagbeedi naj guial ma caydop ree dxej ni zio'p ree loj guidxliuj guie par yaguieen ree xmandad Dios. Zeel bén ni ma baxhliaa ree gol been sirv Dios xt lod guneetzan läjt zil'cgajc ree bén ni ad waxhliaat. [30](#) Ni'qui guialrabaa, ni'qui guialrunaya, ni'qui guial rajp bejn xhienin loj guidxliuj guie achet zajc gudxoon guial güün bejn xmandad Dios. [31](#) Bén ni ad ryaadxt ree xhienin loj guidxliuj guie, gol gunaladx guial achet rajpidi, din gra ni yu' loj guidxliuj guie najn ni rdëd.

[32](#) Ni rënan naj guial ad zutidi xgab por ree ni yu' loj guidxliuj guie. Tijb xinguaaw xtijb mazri rüjnx xgab por xmandad Dios, mazri rüjnx naguiejn güünx zi'c ruladx Dios. [33](#) Per tijb xinguaaw ni ma baxhliaa mazri rüjnx xgab por ree ni yu' loj guidxliuj guie, par laax mazri rüjnx naguiejn yabaanë lacheelix laax. [34](#) Dxel tio'p ma naj

Gui'ch yaloj par ree bén Corinto 7:35xix Gui'ch yaloj par ree bén Corinto 7:40

xixgabix, por Cristo nē por xbéngunaax. Ziangajc tijb béngunaa ni ad waxhliaat mazri rüjnman xgab por ree xmandad Dios guidiblagaa rüjnman sirv loj Dios par güünman zi'c ruladxaman. Per tijb béngunaa ni ma baxhliaa mazri rüjnman xgab por ree ni yu' loj guidxliuj guie, mazri rüjnman naguiejn yabaanë lacheelaman laaman.

³⁵ Gra ni canin lojdi, canin laan par günan läjt yudar ad par gudxontan guxhliaadi, caninan din guibandi zi'c rayal xnejz dxel gol been gol gubajn tée zi'c rën dux Dad ree Jesucrist sin guial gudxoон xhienin läjt.

³⁶ Chutëëz xinguaaw rüjn xgab guxhliaanë biin rnileenëx abi' bal ma yu' biinggaa guin ijj par guxhliaam, güünri reex ni naladx reex naj zagdxe par laa reex. Bal guxhliaa reex, guxhliaari reex. Ad doltan guial guxhliaa bejn. ³⁷ Ziangajc chutëëz bén ni ad rüjnt xgab guxhliaa, ad rayalt güünman xgab guial rüjn naguiejn guxhliaaman bal ma beenman xgab zagdxe guial ad zuxhliaataman. Din zagdxe gajcan bal id zuxhliaa bejn. ³⁸ Zeel rnin lojdi zagdxen guial chu guxhliaa, per mazri zagdxe bal id zuxhliaa bejn.

³⁹ Tijb béngunaa chi ma baxhliaaman, ad rayalt sunëman xinguaaw ren chi nabannë lacheelaman. Per bal guiët lacheelaman ma zajc tia' xin ren laaman per con tijb ree xcompiaraman xin rliladx Jesucrist. ⁴⁰ Per naladxan guial mazri zagdxe guibanman bal id zuxhliaaman stijb. Zian rünan xgab guial nabannë'n xSprijt Dios zi'cgajc läjt.

Gui'ch yaloj par ree bén Corinto 8:1 xx Gui'ch yaloj par ree bén Corinto 8:8

8

Guialraw ni rbe'c ree bejn loj ni naladx reeman naj Dios

¹ Yan, ganin lojdi xcwent ree guialraw ni rbe'c ree bejn loj ree ni naladx reeman naj Dios. Dunuj ree rayagbee guial dugra ree rayignia' xhien-aag yaguileen ree por ree ni guin, per yu' dxej por guialrignia' rlies bejn xvalor gajcaman. Per guialrën lasa' bejn lasajc mazri din por guial rën lasa' bejn zile' yaguileen yudar du lasa' ree din yasnuu yayignia' ree xhienaa rayal yabajn ree.

² Bal yu' bén naladx guial ma bayaaloj rignia'man gra, cusquiee laagajcaman din ryaadx da'tri chignia'man. ³ Per bén ni rën Dios, Dios nünbee laaman.

⁴ Yan por guial raw bejn guialraw ni ma gule'c reeman loj ree ni naladx reeman naj Dios, dunuj ree rayagbee guial achet guialrniabee rajp ree dios guin loj guidxliuj guie, din tijbzi Dios yu'.

⁵ Majsi yu' ree bejn naladx guial yu' zien ree dios bén rniabee xanyabaa në loj guidxliuj, ⁶ per dunuj ree rayagbee guial tijbzi dux Dad ree Dios yu' abi' por laaman yu' gra ni yu' por laa téeeman nadxu' ree loj guidxliuj guie. Tijbzi Jesucrist naj Dad par dunuj ree abi' por laaman yu' gra por laaman tée raya'p ree guialnaban.

⁷ Per ad grat ree bejn rüjn xgab zian. Din yu' ree bén ni guyën graloj ni naladx reeman naj Dios, abi' yan guial qui bililadxri reeman Jesucrist naladx reeman guial dolan gaw tijb bejn guialraw ni ma gurej loj ree dios guin. ⁸ Dunuj ree rayagbee guial ad ni rawt bejn rüjn guiban bejn mazri zagdxe loj Dios, lasa'gajcanan bal yadaaw ree o ad zadaawt

Gui'ch yaloj par ree bén Corinto 8:9 xxi Gui'ch yaloj par ree bén Corinto 9:5

ree lasa' ree guialraw guin. ⁹ Per majsi lëjt ragbee guial zajc gawidi xhietëéznin, rayal gapidi ciudad ad güundi guial ree bén qui rliladxri Jesucrist güün reeman dol. ¹⁰ Din bal lüj guial achet naladxil rawil xhietëéznin, zojbil cayawil guialraw ni ma gurej loj ree ni ad najt dios. Dxel guguaa tijb ree bén qui rliladxri Jesucrist lüj abi' négajcaman sëébladx gaw guialraw guin majsi lën luxdooman naladxaman guial ad zagdxet naj ni cayüjnman. ¹¹ Dxel por xguialrajquil cayünl guial güünman dol guial ad nixt yu' luxdooman cayawaman ni guin ree, per badxe'guijc guial né por laaman güjt Jesucrist loj crüjz. ¹² Zeel bal rüjnl tijb ni naj ni mal par ree bén qui rliladxri ree Jesucrist abi' rüjn reeman dol por lüj, dolan cayünl delant loj Cristo. ¹³ Bal por tijb ni rawan rüjn ree da compniaran dol, mejorli ad zawtran laan chitëe güünman dol por naj.

9

Ni zajc güün tijb apóstol

¹ Lëjt ragbee guial zajc güün ni rënan por guialrniabee ni ra'pan guial najn apóstol. Ma baguaan dux Dad ree Jesucrist abi' lëjt naj ree bén ni ma benan gan par laaman guial ma bililadxidi laaman. ² Bal yu' ree bén ni ad nünbeet naj zi'c apóstol, per lëjt ragbee guial apóstol najn. Din zi'c ma rliladxidi Jesucrist dxel ma rguien guial diidxli najn apóstol.

³ Abi' par ree bén ad rliladxt guial najn apóstol, ze naj ni rën loj reeman: ⁴ Ra'pan derejch gunee reeman ni gawan né ni guië'n. ⁵ Abi' zajc teeë guxhlian con tijb bengunaa naj dulasa' raliduladx

[Gui'ch yaloj par ree bén Corinto 9:6xxii](#)[Gui'ch yaloj par ree bén Corinto 9:14](#)

ree Jesucrist din chinë'n laaman bantëëz guin gan, zi'c rüjn los demazri ree apóstoles con ree bijch Dad Jesucrist nē Béd. ⁶ ¿O najzi con Bernabé bayal yaguieenan xmandad Dios dux cwentan ya? ⁷ Per ni'qui tijb suldad ad rejt loj wadijl xcwentaman, yu'czi bén rguijx xgaxtamán. Ziangular bén rxübin uv, ¿wen id zajc gawaman laan ya? Laadx bén ni rajp vag ree, ¿wen id zajc guië'man xlejch reeb ya? ⁸ Abi' ad xixgabtzi benguidxliujn canin lojdi, nē loj ley ni badëë Dios loj Moisejs rëb zian. ⁹ Din loj ley guin rëb: "Ad gudxe'di guijxh ro' ree be guijxh la'tgaj cayüjn reeb dxiin." Ad rëbt Dios zian guialzi yu'man laa reeb xgab, ¹⁰ rëbaman zian por dunuj ree. Din zi'c bén rlia' yuj zi'c bén rusia trigo, grop reeman yu'guijc guial yu' ni yaca' reeman. ¹¹ Yan ma balün lëjt xhienagaag chinalidi xnejz Dios, ¿wen zro' da't yanaaban lojdi ya bal güundi dunujn yudar din gusnuu dux guialnabanan? ¹² Bal stijb ree bén ni rusiid lëjt rile' rtia' reeman ni rayal gudeëdidi loj reeman, dxel ziangular dunujn raya'pan mazri derejch güundi dunujn yudar.

Per majsi zian dunujn achet wanaaban lojdi zi'c naj derejch ni raya'pan, caydaanzan ni raza'can chitëë xhie cwib guijc guial ad zucaagdiajgtri ree bejn xtiidxza'c Jesucrist. ¹³ Lëjt ragbee guial gra ree bixhioz ni rüjn sirv lën xyadoo Dios, rtia' reeman tibda'n ni rinë ree bén Israel loj Dios persi rile' rbajn reeman. Ziangular gra ree bixhioz ni rüjn ree sirv lule' yadoo guin lod rinë ree bejn be ree par Dios, nē reeman rtia' ta'n ni rinë ree bejn persi rile' rbajn reeman. ¹⁴ Yan laagajcan rëb dux Dad ree Jesucrist por ree bén ni rulüü

[Gui'ch yaloj par ree bén Corinto 9:15](#)[xxiii Gui'ch yaloj par ree bén Corinto 9:22](#)

xtiidxza'caman, guial por ree bén ni rulüü reeman rayal guiban reeman. ¹⁵ Per naj achet caca'n, ad caxhal tötan gui'ch guie lojdi din guneedi xhienin. Din par naj zagdxeli naj guietan luar chu' bén chiquied guialrabaa guin luxdon guial cusidan bejn ree xtiidxza'c Jesucrist.

¹⁶ Ad rayalt gales da valor gajcan guial cusidan bejn ree xtiidxza'c Jesucrist, din mandad guin naj ni bayalan. ¡Prob naj bal idan gusid bejn ree diidxza'c guin! ¹⁷ Zeel bal cayünan mandad guin guial ruladxan günan laan, dxel yu' ni gaca'n. Per ni'qui bal id ruladxan günan mandad guin, laan bayal günan. ¹⁸ Abi' ni rünan gan naj guialrabaa ni yu' luxdon majsi ad naxtan, majsi ad caca'tan ni rayal tia' bén ni rulüü xtiidxza'c Jesucrist, per cusnuu culün diidxza'c guin ree bejn ree.

¹⁹ Abi' majsi ad yu't bén rniabee naj por mandad guin, per laa naj guie par gra ree bejn din gac günan sirv xbejn Cristo. ²⁰ Abi' chi za'n con ree bén Israel, rünan naguiejn persi yu'guijc reeman guial nayajcan bén Israel din günan gan gac reeman xbejn Cristo. Chi za'n con ree bén Israel bén rüjn ree naguiejn chinal xley Moisejs dxel rünan zi'c bén zinal ley guin, din günan gan gac reeman xbejn Cristo, majsi ragbeen guial ad rniabeet ley guin naj. ²¹ Abi' chi za'n con ree bén ad najt bén Israel, bén ad zinalt ree ley guin dxel majsi ragbeen guial Dios naj bén rniabee naj guial nabanan zi'c rniabee Cristo, per rünan naguiejn din guguaa reeman naj zi'cgajc tijb lasa' reeman din gac günan gan gac reeman xbejn Cristo. ²² Chi za'n con ree bén yu'nawëeg par güün reeman o gaw reeman

Gui'ch yaloj par ree bén Corinto 9:23xxiv Gui'ch yaloj par ree bén Corinto 10:1

xhienin, dxel rünan naguiejn din su reeman zagedxe con naj din günan laa reeman yudar gac reeman xbejn Cristo. Bantééz lod ran rünan naguiejn din guguaa reeman naj zi'cgajc tijb lasa' reeman, din günczan gan majsí ta'nzi reeman günan gan gap reeman perdon por Cristo.

²³ Gra ree ni guie cayünan guial rënan xtiidxza'c Jesucrist, din tiblojzi güünle' Dios naj con gra ree bén rliladx diidxza'c guin ree.

²⁴ Lëjt ragbee guial chi yu' tijb carrer zien bejn ruxüün, per tijbzaman naj bén rtia' prem. Zian-gajc lëjt gol been naguiejn tia'di ni gunee Dios.

²⁵ Bén ni ruxüün ree rajp laagajc reeman cu-dad chitëë xhie gudxoón guxüün reeman. Rüjn reeman zian din güün reeman gan, abi' ni rüjn reeman gan naj tijbzí coron balag ni rigool cari. Per dunuj ree ni cayguieen ree naguiejn cayca' ree najn tijb prem ni ad yu't dxej nit. ²⁶ Abi' ragbeechaawan xhienin cayünan, ad cayüntan zi'c tijb bén ni ruxüün sin guial gagbeen chexc, ad rüntan zi'c tijb bén ni rga'p sin guial gagbeeman ban ca'paman. ²⁷ Zeel cusagdiaj naj gajc din gac ganabee naj gajc günan zi'c rayal günan, chitëë guial culün bejn ree xtiidxza'c Jesucrist achet yay-alan delant loj Dios.

10

Guial rën ni ad najt ree Dios

¹ Compniar raliduladx ree Jesucrist, gol basaal-adx guial dux bengol gulal ree bén binal ree Moisejs, gra reeman guza xan zaj ni guxhaal Dios abi' gra reeman gudëd loj nijsdoo ni la nijsdoo xnia.

Gui'ch yaloj par ree bén Corinto 10:2xxv Gui'ch yaloj par ree bén Corinto 10:13

² Zian biguien guial xbejn Moisejs naj reeman din gra reeman guzané laaman xan zaj guin, abi' gudëd reeman con laaman loj nijsdoo guin. Zian gurojnijs reeman loj zaj guin nè loj nijsdoo guin.

³ Gra tèë reeman gudaw guialraw ni bi't diizd xanyabaa. ⁴ Gra tèë reeman gu' nijs ni bazaladx Dios loj reeman, nijs brii lad tijb guiaj. Rèn guiëban guial diizd nadxel mal naban Cristo con laa reeman lod zëtzi reeman. ⁵ Per zien reeman ad beent zi'c ruladx Dios, abi' güjt reeman niz loj yujbidx niz lod guza reeman.

⁶ Gra nine gojc din yayagbee ree guial ad laat yaguieen ree lasa' ree ni mal ni been reeman.

⁷ Ad rayalt yayën ree ni rëb ree bejn naj ree Dios zi'c been zien ree dux bengol gulal ree, din rëb loj xtiidx Dios xcwent reeman: "Gurej reeman, gudaw reeman dxel bisu reeman been reeman ni dxuudx ree." ⁸ Ad rayal tèët güün bejn ni dxuudx con bén ad najt lacheelaman, zi'c been zien ree dux bengol gulal ree abi' tijb dxej güjt gajlbichoон mil reeman. ⁹ Ad zaneeguijdx tèët ree Dios zi'c been zien ree bén guin, abi' gudaw bëël laa reeman persi güjt reeman. ¹⁰ Ad rayal tèët yaguie'ch ree guial ad cayüjnt Dios zi'c rayal, din zian been zien ree dux bengol gulal ree abi' guxhaal Dios tijb anjl bagüjt laa reeman.

¹¹ Gra ni guzac reeman cwan loj xtiidx Dios din yayagbee ree guial ad laat yaguieen ree zi'c been reeman, dunuj ree guial nabajn ree yan guial ma caydop dxej ni yadëëd ree bejn cwent loj Dios. ¹² Zeel bén ni naladx za'dxi'ch loj xnejz Dios, mejorli gapaman cudad chiteë güün dol laaman gan. ¹³ Gra ni cazajquidi ad najtan ni ad rzajct

Gui'ch yaloj par ree bén Corinto 10:14xxvi Gui'ch yaloj par ree bén Corinto 10:22

bejn, din Dios ad zaro'nladxtaman läjt. Ad zuslaat Dios saquidi tijb ni ad zadaantidi, abi' laaman güün läjt yudar din gagbeedi xhienaaq laadi loj ni cayajc.

¹⁴ Zeel compniar raliduladx ree Jesucrist, zi'c rënan läjt rnin lojdi gapidi ciudad ad goc guiëndi ni naladx ree bejn naj dios. ¹⁵ Naj ragbee guial najdi ganax bén rignia', zeel läjt gajc gol been xgab bal zagdxe naj ni canin lojdi. ¹⁶ Chi raguieen ree zi'c been dux Dad ree Jesucrist chi gudaw reeman guxhin bigra, dxel chi radü' ree vin ni ma google' rasaaduladx ree rejn ni ma guxhie'man chi gütaman por dux tol ree. Abi' chi radaaw ree guiadxtil zi'c beenman, laan naj tijb sen guial ma nayajc ree tijbzi con laaman. ¹⁷ Din majsi zien nayajc ree, per zi'c rlia' tijbzi guiadxtil par dugra ree, zian rguien guial ma nayajc ree tijbzi con Cristo.

¹⁸ Lëjt ragbee xhienaaq rüjn ree bén Israel chi rinë reeman tijb gon par Dios, abi' zi'c raw reeman tiblia' gon guin yu'guijc reeman guial ma naj reeman tijbzi con Dios. ¹⁹ Ad canitan lojdi por ree ni naladx ree bejn naj dios guial lasajc reen o guial lasajc guialraw ni gurej loj ree dios guin. ²⁰ Din bén rüjn ree zian ad lojt Diosan rbe'c reeman guialraw guin ree, loj xindxaban rbe'c reeman laa reen. Abi' ad rëntan gaquidi tijbzi con ree xindxab guin. ²¹ Ad zacjt güündi zian par guiguien guial ma najdi tijbzi con ree xindxab guin, abi' gaw tëëdi guiadxtil con vin din guiguien guial ma najdi tijbzi con Cristo. ²² ¿O rëndi ya yache'ch ree Dios? ¿Wen mazri raya'p ree guialrniabee guial lojman ya?

Gui'ch yaloj par ree bén Corinto 10:23xxvii Gui'ch yaloj par ree bén Corinto 10:32

Xhie zajc güün ree xbejn Dios

²³ Graczi zajc güün bejn, per ad gratan naj zagedxe guial güünman. Majsi gra zile' güün bejn, per ad gratan rüjn sirv par güün lasa'man yudar chinalaman xnejz Dios. ²⁴ Din ad rayalt yaguieen ree xgab por dunujzi ree, rayal yaguieen ree xgab por ree dux compniar ree.

²⁵ Zi'c chi rziidi bëël luguia', ad guiniabdiidxidi bal ma gurejn loj xdiros reeman, chitëë xhie guinialadxidi chi gawidi laan. ²⁶ Din xieen dux Dad ree Dios naj guidxliuj con gra ni yu' lojn.

²⁷ Bal tijb bén ad waliladxt xtiidx Dios na lojdi guial chitawidi lidxaman, abi' bal rëndi chedi gol chej. Gol gudaw gra ni gunee reeman lojdi ad xhie guiniabdiidxidi chitëë xhie naladxidi. ²⁸ Per bal yu' xcompniaridi na guial ni cunee bén guin cayawidi ma gurejn loj xdirosaman, ad gawidi laan por bén bagojn lëjt chitëë güünman xgab mal guial ad laat cayüjndi, majsi lëjt ragbee guial xieen dux Dad ree Dios naj guidxliuj né ni yu' loj guidxliuj guin. ²⁹ Ad canitan lëjt xcwent guial xhie naladxidi, ni canin lëjt naj por ree xgab ni zajc güün stijb xcompniaridi por lëjt.

Per wed yu'di rüjn xgab: “Per, ¿chexc zeel ad züntan gra ni ragbeen ad najt ni mal por xixgabzi stijb bejn? ³⁰ Wed rëb tëëdi: Naj ragbee guial rudën quixtëë loj Dios por gra ni rawan, ¿chexquiza zeel güün reeman xgab mal por naj?” ³¹ Per naj rni lojdi gra ree ni guin rayal gudxe'guijquidi din zi'c ni rawidi zi'c ni rë'di né gra ree ni rüjndi rayal güündi laan par güündi Dios bén zojbloj. ³² Gol gojp cuad xhienaaq nabandi din zi'c ree bén Israel zi'c

Gui'ch yaloj par ree bén Corinto 10:33xxviii Gui'ch yaloj par ree bén Corinto 11:8

ree bén ni ad najt bén Israel con ree xcompiariidi bén rliladx ree Jesucrist ad züjnt reeman xgab mal por läjt. ³³ Din zian rünan, rünan naguiejn chitéëe xhie naladx bejn con naj. Ad rüntan ni rüjnzi naj yudar, rünan naguiejn din günan ni rüjn yudar zien ree bejn din gac gap reeman perdon loj Dios.

11

¹ Zeel gol binal zi'c rünan, zi'c zinaalan zi'c been Cristo.

Xhie rayal güün ree bejn chi rbejdx rniab reeman Dios

² Naj dád rabaanë'n läjt guial rusaaladxidi naj, guial yu'guijquidi rüjn téeedi zi'c balün läjt. ³ Rén téeën gusaaladxidi guial Dios rniabee Cristo abi' Cristo rniabee xinguaaw abi' xinguaaw rniabee béngunaa. ⁴ Tijb xinguaaw chi rgu' xhienin guijquix par cwdx guiniabix Dios o gulüüx xtiidx Dios, natu naj ni cayünx. ⁵ Ziangajc chutéëz béngunaa cabejdx canab Dios o culüüman bejn ree xtiidx Dios, abi' achet xoob guijcaman, natu gajc naj ni rüjnman. Güünman cwent guial najman zi'c tijb béngunaa ni biaj guijc xt garej. ⁶ Zeel bal tijb béngunaa ad rëntaman guixhioob xhienin guijcaman, gugajli guijcaman. Per bal ragbeeman, guial natun guiyaj guijcaman xt garej, mejorli guixhioob xhienin guijcaman. ⁷ Per xinguaaw achet zajc chu' guijquix din Dios beenman laax zi'cgajczi laaman, zian rulüüx respejt ni rajpix Dios. Abi' béngunaa guial rxhioob xhienin guijcaman, zian rulüüman respejt ni rajpaman xinguaaw. ⁸ Din ad gojct xinguaaw con guxtil lad béngunaa, béngunaa guin gojc con

Gui'ch yaloj par ree bén Corinto 11:9xxix Gui'ch yaloj par ree bén Corinto 11:20

guxtil lad xinguaaw. ⁹ Ad gojct xinguaaw par béngunaa, béngunaa guin gojc par xinguaaw. ¹⁰ Zeel béngunaa rayal guixhioob xhienin guijcaman din guiguien guial xinguaaw rniabee laaman zi'c rulüü ree anjl chu rniabee laa reeman. ¹¹ Majsi delant loj Dios tiblojzi naj bejn, din bal id béngunaa niu achut xinguaaw niu, abi' bal id chu xinguaaw niu achut béngunaa niu. ¹² Walican, guial con guxtil lad xinguaaw gojc béngunaa, per yan por béngunaa ri't xinguaaw loj guidxliuj, zeel zi'c xinguaaw con béngunaa por Dios yu' reeman loj guidxliuj.

¹³ Naj rni lëjt, lëjt gajc gol been xgab bal zagdxe cwedx guiniab tijb béngunaa Dios abi' achet naxhoob guijcaman. ¹⁴ Bejn gajc ragbee guial natun bal id zugaj guijc xinguaaw. ¹⁵ Per par béngunaa mazri zagdxe rguienman bal guyool guidxgujcaman, din rajpaman laan par gusiaawan guijcaman. ¹⁶ Bal chu ad za't conform por ni canin lojdi, per naj rugojn lëjt guial achet stijb costumbr raya'p ree, zian naj dux costumbr ree con los demazri ree bén rliladx xtiidx Dios.

Ruxhiin reeman zi'c basa'n Dad Jesucrist gac

¹⁷ Yan xcwent ni ma ganin lëjt, ad zile't ganin guial zagdxe naj ni cayüjndi din chi radxaag lasa'di par cwedx guiniabidi Dios, al ni ad rayalt güundi rüjndi. ¹⁸ Yaloj rnin lojdi biguejnan guial chi radxaag lasa'di par cwedx guiniabidi Dios ad raya'ntidi diidx, abi' tiblad rliladxanan. ¹⁹ Din nawëeg najn guial ad zajct zian, abi' zian rguien chu diidxli zinal xnejz Dios. ²⁰ Per por zianzi, achetri sirv rüjn guial radxajg lasa'di par gawidi

Gui'ch yaloj par ree bén Corinto 11:21xxx Gui'ch yaloj par ree bén Corinto 11:27

xche zi'c been dux Dad ree Jesucrist. ²¹ Din tijbgajdi rüjn naguiejn diob gawidi, ad rbéjzt xcompiaridi. Abi' la'tgaj yu' ree bejn rliaan, yu'di raw da't abi' xt rzüdxidi guial ré'di zi'ctzi rëndi. ²² ¿Id yu' lidxidi ya lod gawidi guië' téedi zi'ctzi rëndi?, ¿o ad rëntidi xcompiaridi bén rliladx ree xtiidx Dios ya, zeel rusa'nxtudi bénprob ree bén achet rajp? Yan, ¿rëndi ya chu' luxdon zagdxe con läjt por zian? ¡Per zian zi'c cayüjndi, ad zajct ganin lojdi guial zagdxe naj ni cayüjndi!

Ni bigra gudaw Jesucrist xche

(Mt. 26:26-29; Mr. 14:22-25; Lc. 22:14-20)

²³ Abi' ni balün läjt, basidan laan por dux Dad ree Jesucrist guial guxhin ni bayü reeman laaman chi bigra gudawaman xche, cwa'man tijb guiadxtil. ²⁴ Abi' chi gulox badëëman quixtéë loj Dios dxel gula'man guiadxtil guin, rëb gajman: "Guiadxtil guie naj da cuerpan ni ma bayün par guietan por läjt. Abi' chi güundi zian, gol beenan guial gusaaladxidi naj." ²⁵ Ziengajc beennëman cojp ni yu' vin chi gulox gudaw reeman xche, dxel rëbaman: "Vin guie naj da rejnan ni gaxhie'n chi guietan par gaxhalan tijb nejz cüb guial xhienaaag gac ree bejn perdon loj Dios. Abi' chi güundi zian, gol been zian guial rusaaladxidi naj." ²⁶ Zeel, beegaj chi radxaag lasa'di par gawidi xche zi'c been dux Dad ree Jesucrist, chi rawidi guiadxtil rë' téedi vin, zian rulüüdi guial güjtaman por läjt, gol been zian xt chi gui'taman loj guidxliuj guie zatijb.

Xhienaaag rayal gac xche

²⁷ Yan bal yu' bén raw guiadxtil rë' téëman vin xche guin, abi' ad yu' guijctaman ni rën

Gui'ch yaloj par ree bén Corinto 11:28xxi Gui'ch yaloj par ree bén Corinto 12:2

guiëb ni cayüjnman, dolan cayüjnman guial ad yu'guijctaman ni rën guiëb xcuerp né xrejn dux Dad ree Jesucrist. ²⁸ Zeel rayal güün bejn xgab xhienaag nabanman delant loj Dios dxel ma zajc gawaman guiadxtil guië' téeeman vin xche guin. ²⁹ Din bén raw guiadxtil guin con vin guin abi' ad yu'guijctaman ni rën guiëb xcuerp Jesucrist. Laagajcaman caguiil xcasti. ³⁰ Din guial rüjn ree bejn zian zeel dák ziendi ragxuu, zien tëëdi ad yu't gojl abi' zien reeman ma güjt. ³¹ Per bal yalojxgaj yaguieen ree xgab xhienaag nabajn ree loj Dios dxel ma zajc yadaaw ree xche guin, achetri xcasti Dios yayal ree. ³² Per ziangajc bal yu' xcasti Dios ni yayal ree, laan naj par guzuxnejzaman dunuj ree chitëë yaguieen ree dol, chitëë yayal ree casti ni rayal ree bén ad rliladxt xtiidxaman.

³³ Zeel compniar raliduladx ree Jesucrist, chi radxaag lasa'di par gawidi, gol gulëjz ree xcompniaridi din gawidi tijbzi. ³⁴ Per bal yu'di ad zajct cwëz guial ma rliaandi, zagdxeli gaw lidxidi chitëë yayalidi xcasti Dios guial ad züjntidi zi'c rayal. Gra ni rayal ganin lojdi, chi guialan guidganan lëjt dxel yanee ree.

12

Quiarguiejn ni runee xSprijt Dios

¹ Yan ganin lëjt, quiarguiejn ni runee Dios loj tijb gaj bejn por xyudar xSprijt Dios, din ad rëntan guibandi sin guial gagbeedi ni guin ree.

² Lëjt ragbee guial chi gadidi güünbee Dios dxel gogdxadi, bidxga'di ni na ree bejn lojdi naj ree

[Gui'ch yaloj par ree bén Corinto 12:3xxxii](#)[Gui'ch yaloj par ree bén Corinto 12:11](#)

dios abi'za ni'quid rniet reen. ³ Zeel gol gog-bee, chutëëz bén rnieguijdx Jesucrist, rën guiëban guial ad nabannëtaman xSprijt Dios. Achu tëët bejn zajc guiëb: “¡Jesucrist naj bén rniabee naj！”, bal id nabanman con xSprijt Dios.

⁴ Quiarguejn rent quiarguejn ren runee Dios dunuj ree, per Sprijt guin gajc naj bén ragnë dugra ree. ⁵ Majsi ni rent ni ren naj xmandad Dios ni cayguieen ree, per laagajcaman naj bén ni cayguieen ree sirv. ⁶ Abi' majsi garent garen cayüjn tijbgaj bejn, Dios gajc naj bén ni cayüjn yudar tiblojzi. ⁷ Tijbgaj dunuj ree rulüü Dios ni rayal yaguieen ree con xyudar xSprijt Dios din yaguieen ree yudar dux compniar ree. ⁸ Din con xyudar xSprijt Dios yu' ree bén ma ca' quiarguejn par guiniee reeman, yu' tëë ree bén ma ca' quiarguejn par chignia' reeman diidxli xcwent Dios. ⁹ Abi' por xyudar xSprijt Dios yu' ree bén ma cwa' guialrliadix ni guidiblagaa. Yu' tëë ree bén ma cwa' guialrniabee par yayüjn reeman bénragxuu ree. ¹⁰ Yu' tëë ree bén ma cwa' guialrniabee par güün reeman gadxagayaa ree milagr. Yu' ree bén ma ca' quiarguejn par gudeëd reeman xtiidx Dios loj ree bejn. Yu' tëë ree bén ma cwa' ree quiarguejn par gagbee reeman bal wali o ad walit ni canee bén rëb guial caneeman xtiidx Dios. Yu' tëë reeman ma ca' quiarguejn par guiniee reeman gadxagayaa ree diidx, abi' yu' reeman ma ca' quiarguejn par yadëëd reeman tijb diidx par stijb diidx. ¹¹ Per por xyudar gajc xSprijt Dios rüjn bejn ni guin ree, laaman ma ragbee conin rudëëman güün tijb gaj bejn ni naladxaman naj zagdxe.

Gui'ch yaloj par ree bén Corinto 12:12xxxiii Gui'ch yaloj par ree bén Corinto 12:23

Tijbzi cuerp nayajc dugra ree

¹² Din zi'c dux cuerp ree majsi zien la' najn, per tijbzi nayajc ree. Zianganjc dunuj ree guial raliduladx ree Jesucrist majsi zien nayajc ree per tijbzi nayajc ree con laaman. ¹³ Din dugra ree barobnijs por tijbzi xSprijt Dios par yayajc ree tijbzi con gra ree dux compniar ree majsi nayajc ree bén Israel o ad nayaject ree bén Israel, bal nayajc ree zi'c bén nado' o ad nayaject ree zi'c bén nado', per tijbzi ma nayajc ree din dugra ree tiblojzi nabajn ree con xSprijt Dios.

¹⁴ Léjt ragbee guial ad tiblia'tzi naj xcuerp bejn, zien la' naj xcuerp bejn. ¹⁵ Yan bal guiëb guia' bejn: "Ad najtan tiblia' xcuerp bejn din ad najtan yaa bejn." Per ad por ziant ad najt guia' bejn tiblia'man. ¹⁶ Zianganjc majsi guiëb guidiajg bejn: "Ad najtan tiblia' xcuerp bejn din ad najtan guiaalojman", ad por ziant ad najtri guidiajgaman tiblia' xcuerpaman. ¹⁷ Din bal guidib xcuerp bejn niajc guiaalojman, ¿xhieza naag niguiejnman?, o bal guidib xcuerp bejn niajc guidiajgaman, ¿xhieza naag niuxi'man? ¹⁸ Per Dios ma ragbeeman banguin rayal guzoobaman tiblia'gaj ni naj xcuerp bejn din gacaman zi'c rënman. ¹⁹ Din bal niajc xcuerp bejn tiblojzi, dxel ad najtran cuerpa. ²⁰ Per zi'c ma rnin léjt majsi zien la' naj xcuerp tijb bejn per tijbzi naj guidiban.

²¹ Ad zajct guiëb guiaaloj bejn loj yaaman: "Ad ryaadxtan lüj." Ad zajct téet guiëb guijc bejn loj guia'man: "Ad ryaadxtan léjt." ²² Din luar lod rulüü ad rüjnza'ct sirv, laa reen naj ni mazri rüjn sirv. ²³ Abi' ree luar lod ad rguiwent zagdxe,

Gui'ch yaloj par ree bén Corinto 12:24xxxiv Gui'ch yaloj par ree bén Corinto 12:31

raguieen ree naguiejn din guiguien reen zagdxe. Guiáad ree luar naguie'ch, mazri raya'p ree ciudad luar guin ree rata'cw reen din guiguien reen zاغdxe. ²⁴ Ad zro't radxu' ree xgab por ree luar ni rguien, mazri raya'p ree ciudad luar naguie'ch ree zeel radojt ree xhienin din guiguien zاغdxe dux cuerp ree. Zianan been Dios xcuerp bejn ²⁵ din chitéë yaguieen ree xgab guial yu'lod ad rüjnt sirv, guidib dux cuerp ree rüjn yudar lasa! ²⁶ Chi rdoob tiblajt xcuerp bejn guidib xcuerp bejn rdoob, abi' bal nix yu' tiblajt xcuerp bejn guidib xcuerp bejn yu' nix.

²⁷ Yan ziangajc guial nayajc ree tijbzi con Cristo dugra ree nayajc ree zi'c tijbzi cuerp par laaman, tijb gaj dunuj ree nayajc ree tiblia' cuerp guin. ²⁸ Abi' entr gra dux compniar ree bén rliladx Jesucrist. Dios yaloj bacaabeeman bén naj ree xi apóstoles Jesús, ni barojp bacaabeeman bén gudéed ree xtiidxaman loj ree bejn, bayon bacaabeeman bén gulüü ree xtiidxaman bejn ree, dxel bacaabeeman bén gap ree guialrniabee par yayüjn reeman bénragxuu ree. Bacaabee téeeman bén güün ree gadxagayaa milagr. Bacaabee téeeman bén ni güün ree yudar bejn ree. Bacaabee téeeman bén ni nabee ree loj ree bén rliladx xtiidxaman abi' bacaabeeman bén ni rniecee ree zien ree diidx. ²⁹ Ad grat ree bejn naj apóstoles ad gra téeet ree bejn zajc gudéed xtiidx Dios loj ree bejn, ad grat ree bejn zajc gulüü xtiidx Dios bejn ree. Ad grat ree bejn zajc güün milagr, ³⁰ ad gra téeet ree bejn zajc yayüjn ree bénragxuu, abi' ad grat bejn zajc guiniee zienloj diidx ad gra téeet bejn zajc yayüjn tijb diidx zatijb diidx. ³¹ Per gol been

Gui'ch yaloj par ree bén Corinto 13:1xxxv Gui'ch yaloj par ree bén Corinto 13:9

naguiejn din gunee Dios läjt quiargueijn zagdxe
ree, abi' naj ganin läjt conin naj nejz mazri zagdxe
chinalidi.

13

Xcwent guial rën bejn ree

¹ Din bal rajc rnien zienloj diidx ni rniece béngeuidxliuj nē xtiidx ree anjl yu' xanyabaa, per bal id rēnan bejn najzan zi'c tijb guiib rzijdx o zi'c tijb plati ni yu' cha'. ² O bal nayalan nudēdan xtiidx Dios loj ree bejn, o nia'pan quiargueijn par niagbeen gra ni zëed por Dios ni gad gagbee bejn, o nia'pan zienloj guialrignia' o nia'pan tijb guialrliladx Dios ni xt zile' guchan xlajt ree guia', per bal id rēnan bejn ree achet lasajcan. ³ Ziangajc majsi gagui'san gra ni ra'pan loj ree bén ni ryaadx laan abi' yayü da cuerpan din che'can, per bal id rēnan bejn ree achet lasajc ni cayünan.

⁴ Guial rën lasa' naj gap pacens lasa' bejn, gac bejn benza'c con lasa'man, ad zadēdlojt lasa' bejn, ad züjnt bejn nabë, ad züjnt bejn benro' loj lasa'man. ⁵ Guial rën lasa' naj gap respejt lasa' bejn, ad gac bejn naxhien, ad yaleny'a'man, ad chu'xyajn tēë lasa' bejn, ⁶ ad rayalt yabaa bejn por ni mal ni cayün bejn o ni cazajcaman, rayal yabaaman chi zë bejn xnejz. ⁷ Guial rën lasa' naj güün bejn perdon lasa'man ni güünnëtzi reeman laaman, abi' chililadx lasa'man, ad zadxag tēétaman cwëzaman ni cabëzaman, taan tēëman ni rüjnnëtzi reeman laaman. ⁸ Guial rën lasa' ad yu't dxej loxan, per guialrajc yu' dxej loxan, ad zu tēëtri bén ni rüdëed ree xtiidx Dios loj ree bejn ni'qui ree bén rniece zienloj diidx. ⁹ Din yan bal

Gui'ch yaloj par ree bén Corinto 13:10xxxvi Gui'ch yaloj par ree bén Corinto 14:3

rayignia' ree, tibda'nzi naj ni rayignia' ree abi' bal radëed ree xtiidx Dios loj ree bejn, tibda'nzi rayagbee ree xcwentaman. ¹⁰ Per chi guidxin dxej yayignia' ree gran, dxel achetri lasajc ni rayagbee ree yan.

¹¹ Chi gocan xindoo gunen zi'c xindoo, benan xgab zi'c xindoo, go'pan xquiarguejn xindoo. Per chi bidxin dxej gojcan bengol basa'nan gra guial xindoo tiblad. ¹² Ziangajc yan ad rayignia't ree gra zi'cgajc chi ad rguient zagdxe loj tijb guiaawajn, per chi guidxin dxej yadxin ree lod zojb Dios dxel yayignia' ree gra. Yan yu'zi ni rignia'n per chi guidxin dxej guidxinan lod zojb Dios dxel günbeen gra zi'c nünbeeman naj.

¹³ Choon naj ree ni ad yu't dxej lox, guialrliladx Dios, guialrbëz ni gunee Dios, në guial rën Dios dunuj ree. Per loj guiyon ree ni guin mazri lasajc guial rën Dios dunuj ree.

14

Guialrniee stijb diidx

¹ Gol been naguiejn gol guyën ree bejn, gol gurejdx gunab tée Dios din guneman xquiarguejndi din güundi xmandadaman, per mazri rüjn naguiejn gapidi quiarguejn par gudëëdi xtiidx Dios loj ree bejn. ² Bén rniece tijb diidx ni ad rignia't gra bejn, güünman cwent guial achut caneenëman. Tijbzi Dios caneenëman guial achut rignia' xtiidxaman, tijbzi laaman ragbee ni caneeman per bejn ree ad ragbeet reeman ni rën guiëb ni caneeman. ³ Per tijb bén rulüü xtiidx Dios bejn ree cayüjnman yudar xhienaa chinal bejn xtiidx Dios, cudëëdaman consejw loj ree bejn

Gui'ch yaloj par ree bén Corinto 14:4xxxvii Gui'ch yaloj par ree bén Corinto 14:12

ragu' tēēman luxdoo reeman. ⁴ Abi' bén rniece tijb diidx ni ad rignia't gra ree bejn, par tijbzi laaman naj ni caneeman, per bén rniece xtiidx Dios cayünman yudar gra ree xbejn Dios din gusnuu chinal reeman xnejzaman.

⁵ Bal zianclaa gradi niajc niniee zienloj ree diidx, per mejorlan bal zajc gulüüdi bejn ree xtiidx Dios. Din mazri lasajc guial guiniee bejn xtiidx Dios guial loj guial guinieeman zienloj ree diidx, o bajtēē bal zile' guiëbaman loj ree bejn xhie rën guiëb ni rnieeman din güün sirv ni rnieeman gra ree bejn. ⁶ Din zi'c naj bal guitixlon läjt compniar raliduladx ree Jesucrist, abi' ganen lojdi tijb diidx ni ad zignia'tidi, ¿xhieza sirv güünan läjt bal id canin lojdi zagdxe ni balüü Dios naj o ni ragbeen o bal id canen xtiidx Dios lojdi zagdxe o xhietëëz zatijb ni rayal gusiididi?

⁷ Zi'c tijb ni rucwejdx reeman, zi'c tijb bidxa o tijb arp bal id zucwejdx bejn laan zagdxe ad zignia't ree bejn xhienin cucwejdxaman. ⁸ Ziangajc bal id zucwejdx reeman zagdxe trompejt loj wadijl, ¿xhieza naag chignia' reeman guial ma rayal suchaaw reeman par til reeman con ree bén rayal tilnë reeman? ⁹ Yan ziangajc bal guinieenëdi bejn ree con tijb diidx ni ad rignia't reeman, ¡xhieza naag chignia' reeman ni rëbidi! Xlia'zi caneedi achut rignia' ni rnieedi. ¹⁰ Lëjt ragbee guial zienloj diidx yu' loj guidxliuj guie, per graczan yu' ni rëban par bén rignia' laan. ¹¹ Per bal chu guinieenë naj con tijb diidx ni ad rignia'tan dxel benzit najman par naj abi' za naj benzit najn par laaman. ¹² Zeel zi'c rëndi gapidi quiarguejn por

[Gui'ch yaloj par ree bén Corinto 14:13xxxviii](#)[Gui'ch yaloj par ree bén Corinto 14:20](#)

xyudar xSprijt Dios par güündi xhietëëz ni naj xchiin Dios, gol gunab loj Dios din yazaladxaman quiargueijn lojdi din gac güündi ni rüjn sirv par gra ree xbejn Cristo.

[13](#) Zeel bén ni rniece tijb diidx ni ad rignia't gra ree bejn, rayal guiniabaman loj Dios din gagnëman laaman din gac gusignia'man bejn ree ni rëbaman. [14](#) Din zi'c naj bal gabedx ganaaban Dios con tijb diidx ni ad rignia'tan dxel tijbz da sprijtan ragbee ni canen, per naj ni'quid ragbeetan xhienin canen. [15](#) Zeel ni rayal günan naj, gabedx ganaaban loj Dios con da sprijtan abi' gagbeen xhie rën guiëb ni canen. Ziangularj chi rolan cant ree par Dios rayal gagbeen chignia' tëen xhie rën guiëb ni cayolan. [16](#) Din bal rnieceel diidx zagdxe ree loj Dios con diidx ni ad rignia't ni'qui lüj. Dxel bén za' con lüj, ad zajct guiëbaman "Amén" chi ma gulox badëëdil quixtëë loj Dios guial ad rignia'taman ni rnieceel. [17](#) Majsi nix da't badëëdil quixtëë loj Dios, per achetczi yudar beenl bén za' con lüj par gagbeeman xhienaaq chinalaman xnejz Dios guial ad bignia'taman ni rëbil. [18](#) Quixtëë Dios naj mazri rajc zien loj diidx guial loj gradi. [19](#) Per majsi zian chi za'n lod rado'p ree dux compniar ree bén rliladx ree Jesucrist par ganenë'n laa reeman, par naj mejorli naj ganenë'n laa reeman con gaay diidx per diidx ni chignia' reeman në ni güün laa reeman sirv din gülüü reeman ben ren ree luar ganenë'n laa reeman con chiimil diidx ni ad rignia't reeman.

[20](#) Compniar raliduladx ree Jesucrist, ad bal rüjnridi xgab zi'c xindobëz. Gol gojc zi'c xindobëz

Gui'ch yaloj par ree bén Corinto 14:21xxxix Gui'ch yaloj par ree bén Corinto 14:26

per guial ad züjntidi ni mal, per par güundi xgab gol been xgab zi'c bengol. ²¹ Loj xtiidx Dios rëb: "Gaxhalan bén rninee ree diidx ren, bén ad najt ree bén niz guie din guinieenë reeman bén guie ree. Per ni'qui zian ad zuzoobt reeman da diidxan, rëb dux Dad ree Dios." ²² Zeel guial rnilee zienloj diidx, najn tijb sen par ree bén ad rliladxt xtiidx Dios din chililadx reeman. Per guial rulüü bejn ree ni rën Dios gagbee reeman, laan naj ni güün sirv par ree bén ma rliladx ad par bén ad rliladxt. ²³ Per ni'qui zian chi radxaag lasa'di par gucaagdijaguidi xtiidx Dios, abi' bal suloj guiniee tijb gajdi gadxagayaa diidx ni achut rignia' abi' chu' ree bén qui bililadxri xtiidx Dios o bén ad waliladxt ree xtiidxaman, ¿wen id zanaladx reeman ya guial guijquidi rajc? ²⁴ Per bal chu' bén qui bililadxri o bén ad waliladxt abi' caneedi xtiidx Dios, dxel chi guiguijnman ni caneedi, gagbeeman xhie dol cayüjn reeman, laagajcaman gagbee chu na-jman. ²⁵ Zian gagbeeman xhienaaag nabanman dxel guzuxibaman cwedx guiniabaman Dios, abi' guiebaman guial diidxli za' Dios con läjt.

Gol been gra xnejz

²⁶ Gra ni canin lojdi compniar raliduladx ree Jesucrist, caninan din gagbeedi guial chi rado'pidi par gucaagdijaguidi xtiidx Dios, gradi zajc güün ni chile' güundi, bén ni gool cant par Dios, bén ni gulüü ree bejn, bén gugojn bejn ree conin balüü Dios lojman, bén guiniee diidx ren ni ad rignia't gra bejn në bén gudëed xtiidxaman loj ree bejn. Per gra ni güundi güün sirv par güünan yudar los demazri ree xcompniaridi din gusnuu

Gui'ch yaloj par ree bén Corinto 14:27xl Gui'ch yaloj par ree bén Corinto 14:35

sudxi'ch reeman loj ni rliladx reeman xtiidx Dios.
²⁷ Bal yu' bén rninee tijb diidx ni ad rnieet gra
bejn, tio'pzaman o choonzaman guiniee diidx ni
rajcaman, abi' tijb gaj tijb gaj reeman guiniee,
chu' tëe bén ni guiëb loj ree bejn xhie rën guiëb
ni rëb reeman. ²⁸ Per bal id yu' bén zajc gugojn
bejn ree xhienin rëb reeman con diidx ni rajc
reeman, mejorli achet guiëb reeman delant loj
ree bejn. Zagdxeli laazi reeman cwedx Dios lën
luxdoo reeman. ²⁹ Abi' ree bén gugojn delant loj
gra ree bejn conin balüü Dios laa reeman, tio'pzi
reeman o choon reeman guiniee. Abi' los demazri
reeman gucaagdiajg bal zagdxequi naj ni canee
reeman. ³⁰ Per bal tijb bén zojb cucaagdiajg loj hor
guin gulüü Dios laaman xhienin, rayal yacwëëz
bén canee din gac gugojn bén guin bejn ree xhie
nin balüü Dios lojman loj hor guin. ³¹ Gra ree
bén ni bayal gudëëd xtiidx Dios loj ree bejn, gradi
zajc gugojn bejn ree xhienin balüü Dios léjt, per
tijb gajdi chi yayalidi din gra ree bén cucaagdiajg
gusiid reeman chu' tëe luxdoo reeman. ³² Gol
badxe'guijc guial ree bén rudëë xtiidx Dios loj
ree bejn laagajc reeman rniabee laa reeman din
guiniee reeman chi rayal guiniee reeman. ³³ Din
Dios ad rëntaman tijb ni ad najt xnejz, rënman
tijb ni naj xnejz din yabedxe luxdoodi con ree
xcompniaridi.

Yan, zi'c rajc gra ree luar lod rado'p ree xbejn
Cristo, ³⁴ loj hor ni ma cucaagdiajg reeman xtiidx
Dios ad yu't permis guiniee ree bëngunaa rayal gu
zoob reeman xtiidx xixinguaaw reeman zi'c rëb
Dios güün reeman diizd gulal. ³⁵ Bal xhie rën ree-

Gui'ch yaloj par ree bén Corinto 14:36xli Gui'ch yaloj par ree bén Corinto 15:5

man gagbee reeman, mejorli lidx reeman guini-abdiidx loj lacheel reeman, din natun guiniee tijb bengunaa loj hor ni cucaagdiajg reeman xtiidx Dios.

³⁶ Gol basaaladx guial ad läjtit naj bén yaloj cwa' xtiidx Dios ad tijb tötzi läjt ragbee xtiidx Dios din güündi zi'c naj xixgabidi. ³⁷ Bal chu bén naladx guial ma cwa'man quiargueijn par gudëëman xtiidx Dios loj ree bejn o por xSprijt Dios ma cwa'man xhie stijb quiargueijn, dxel laa gagbee gajcaman guial ni cucan loj gui'ch guie najn zi'c rniabee dux Dad ree Dios. ³⁸ Per bal id rliladxaman ni canin lojdi loj gui'ch guie, ziangajc ad chililadxidi xtiidxaman.

³⁹ Yan zi'c ma rnin lojdi compniar raliduladx ree Jesucrist, gol been naguieijn din gapidi quiargueijn din gudëëdi xtiidxaman loj ree bejn, ad bal gudxoondi guiniee tijb ree xcompnariadi bén rninee tijb diidx ni ad rignia'tidi. ⁴⁰ Per gra ni rüjndi gol beenan xnejz, gol beenan zi'c rayal.

15

Baban Jesucrist loj ree bengüt

¹ Compniar raliduladx ree Jesucrist, rën tœen gusaaladxidi xtiidxza'c Jesucrist ni ma rnin lojd, diidxza'c ni ma bililadxidi loj ni za'dxi'chidi. ² Gol basaaladx guial por ree diidxza'c guin ma rajpidi perdon por xtolidi bal walidi zinalidi laan, per bal id zinalidi laan bililadx xlia'zidi laan.

³ Yalojxgaj balün läjt ni basidan yaloj. Rnin lojdi guial Cristo güt por dux tol ree zi'c rëb loj xtiidx Dios. ⁴ Abi' biguie'chaman dxel ni goc choon dxej babanman zi'cgajc rëb loj xtiidx Dios. ⁵ Chi ma

[Gui'ch yaloj par ree bén Corinto 15:6](#)[xlii](#)[Gui'ch yaloj par ree bén Corinto 15:17](#)

babanman, dxel balüülojman loj Bëd dxel loj los demazri ree apóstoles. ⁶ Zianz balüülojman në loj ree tijb cwaa ree bén rliladx laaman, gojc reeman mazri de gaay gayuu bejn. Yu' reeman ma güjt, per mazri zien reeman sta naban. ⁷ Balüü loj tëëman loj Santiaaw dxelri loj ree apóstoles. ⁸ Ni bigra balüülojman lon, naj najn zi'c tijb xindo ni rajl chi ma gudëd tiamp ni rayal galix. ⁹ Din naj ta'nzi lasajcan loj los demazri ree apóstoles, abi' ad rayalt guirii lan apóstol guial basagzin bén rliladx ree Jesucrist. ¹⁰ Per guial naj Dios benza'c zeel najn ni najn, abi' ad bayaxlia'tzaman naj din naj mazri ma benan xmandadaman guial loj los demazri ree xbejn Jesús, majsi diidxliczi ad da xtijbt naj cayünan ni cayünan, në con xyudar Dios cayünan laan. ¹¹ Zeel achet güünan bal por chunin biguiejndi xtiidx Dios bal por naj o por stijb ree xbejn Jesús, ni mazri lasajc naj guial ma biguiejndan abi' ma bililadxidan.

Yaban ree bengüt

¹² Yan zi'c ma balüün läjt xtiidx Dios guial baban Cristo, ¿chexquiza zeel yu'di rëb ad zabant ree bengüt? ¹³ Bal id zaban ree bengüt, rën guiëban guial ad babant Cristo. ¹⁴ Abi' bal id baban Cristo dxel achet sirv ni caylüün läjt,ache tëët sirv ni rliladxidi laaman. ¹⁵ Dxl bal zianan, ganax diidx rusquieen caynan por Dios guial ma ranan ma baban Jesucrist. Abi' bal id walin guial yaban ree bengüt, dxel ad walitan guial baban Jesucrist. ¹⁶ Din bal id zaban ree bengüt, dxel ni'qui Jesucrist ad babantri. ¹⁷ Abi' bal id babanman, achet sirv guial rliladxidi laaman ache tëët perdon yu' por

Gui'ch yaloj par ree bén Corinto 15:18xlíi Gui'ch yaloj par ree bén Corinto 15:31

xtolidi. ¹⁸ Bal naj zian, xt ree bén ma güjt achet xperdon reeman majsi bililadx reeman Jesucrist. ¹⁹ Bal lojzi guidxliuj guie güün sirv ni baliladx ree Jesucrist dxel dunujzi ree nayajc ree bén naban mazri naya guial loj chutéëz bénan.

²⁰ Per diidxliczi Jesucrist naj bén baban, abi' laaman naj quib bén yaloj baban. ²¹ Abi' zi'c bidoonloj guialgüjt loj guidxliuj guie por tijb bejn, ziangajc por tijb bejn yaban ree bengüt. ²² Zi'c bidoonloj guialgüjt par gra ree bejn por Adán, ziangajc yan por Jesucrist ma yu' stijb guialnaban par ree bén rliladx laaman. ²³ Per gra gac zi'c rayal: Yaloj Jesucrist naj bén baban, dxel chi gui'taman stijb dxel ma yaban ree bengüt bén bililadx ree laaman. ²⁴ Abi' chi ma beenman gan gunabeeman gra ree bén rdxe'ch laaman, zi'c ree bén rajp guialguxtis né ree bén rajp graloj guial rniabee, dxel ma yayü xguialrniabee man loj dux Dad ree Dios. ²⁵ Din rayal nabee Cristo xt chi ma beeman gan canabeeman gra ree bén rdxe'ch laaman. ²⁶ Abi' ni chigra gunidlojman naj guialgüjt. ²⁷ Loj xtiidx Dios rëb guial Dios badëë guialrniabee loj Jesucrist din nabee man gra, per ad rënt guiéban guial né Dios rniabee man din Dios badëëd guialrniabee lojman. ²⁸ Abi' dxej ni ma rniabee Jesucrist loj gra dxel yayüman guialrniabee ni badëëd Dios lojman din ma nabee tijbzi Dios gra.

²⁹ Yan bal id zabán ree bengüt, ¿chexquiza zeel yu' ree bén rirobnijs xcwent ree bén ma güjt, abi'za bal id zabán ree bengüt?

³⁰ Achet sirv guial nadxu'n loj ni nadxeb gra hor. ³¹ Din rugojnan läjt, gra dxej za'n loj guialgüjt, laan

Gui'ch yaloj par ree bén Corinto 15:32xliv Gui'ch yaloj par ree bén Corinto 15:41

naj ni diidxli ni rnin lëjt zi'cgajc walin guial dad nix yu' luxdon con lëjt guial najdi xbejn Cristo. ³² Yan bal naabzi loj guidxliuj guie güün sirv ni cayünan dxel achet sirv ni basajc ree bén Éfeso naj, naj reeman bendoxh zi'c ree bedoxh. Din bal id zaban ree bengüt mejorli yaguieen ree zi'c rëb ree bén rëb: "Yadaaw ree yadü' tëë ree din guixie ma bayëjt ree."

³³ Per naj rni lëjt ad tiëbidi gusquiee reeman lëjt. Din guial ridxga' xtiidx ree bén ni ad zët xnejz, najzan par guxhiinan zi'c nabandi. ³⁴ Zeel gol been xgab zi'c rayal ad bal rüjn tëëridi dol din yu'di ni'quid nünbeetidi Dios, zeel canin lojdi zian din yaya'nxtudi.

Xhienaaq yaban ree bengüt

³⁵ Per wed yu'di rüjn xgab: "¿Xhieza naag yaban ree bengüt? ¿Xhienaaq naj cuerp ni gap reeman?"

³⁶ Per xgab guin xgab tontzan. Din lëjt ragbee guial chi rxübin bejn tijb xhaj xhienin, chi rliejnan dxel rnijt xhaj ni guxübinman. ³⁷ Ad cwaan ni rliejn quint rxübin bejn, xhajnan rxübinman, zi'c rüjn bejn con trigo o xhietëëz stijb xhaj nin.

³⁸ Per chi rliejnan ma najn cwaandoo zi'c rniabee Dios gacan, xhietëëz xhaj nin ni rxübin bejn ma yu' cwaando ni guilienan. ³⁹ Zi'c nadxxaa xcuerp bejn con xcuerp ree be, nadxxaa tëë bëjl con xcuerp ree biguijn. ⁴⁰ Nadxxaa tëë ree ni yu' xanyabaa con ree ni yu' guidxliuj, nadxxaa naj guialza'cdxoон ree ni yu' xanyabaa con ree ni yu' loj guidxliuj. ⁴¹ Nadxxaa xbacha' gubijdx guial loj bëëw nadxxaa tëë xbacha' ree bajl xanyabaa, xt ree bajl xanyabaa garent garen naj xbacha' reen.

Gui'ch yaloj par ree bén Corinto 15:42xlv Gui'ch yaloj par ree bén Corinto 15:52

42 Yan ziangajc gac con guial yaban ree bengüt. Cuerp ni rguie'ch rodyan, per cuerp ni gap bejn stib ad yu't dxej godyan. **43** Cuerp ni rguie'ch rxinan, per chi yaban bejn stib ma gapaman tib cuerp za'cdyoon ni achet gac. Cuerp ni rguie'ch guin achet gojl yu'n, per chi yaban bejn stib ma gapaman cuerp ni yu' gojl. **44** Rguie'ch cuerp ni rajp bejn loj guidxliuj guie, per chi yaban bejn stib ma gapaman tib cuerp ni güün sirv par xanyabaa. Din zi'c yu' cuerp par loj guidxliuj guie ziangajc yu' cuerp par xanyabaa.

45 Loj xtiidx Dios rëb guial yaloj Adán gojp guialnaban loj guidxliuj guie. Dxel bi't Jesucrist, bén razaladx guialnaban loj ree bejn. **46** Ad yalojt rajp bejn guialnaban ni gapaman xanyabaa, yalojxgaj rajpaman guialnaban loj guidxliuj guie dxel guialnaban xanyabaa. **47** Adán gojcaman con yuj zeel najman bënguidxliuj, per Jesucrist xanyabaa zëédaman. **48** Gra ree bënguidxliuj naj xcuerp reeman zi'c goc xcuerp Adán loj guidxliuj guie, per chi guidxin dxej dxel gap ree bejn tib cuerp lasa' cuerp ni rajp Jesucrist xanyabaa. **49** Din zi'c nayajc ree zi'c goc Adán loj guidxliuj guie, ziangajc yayajc ree zi'c naj Jesucrist xanyabaa.

50 Abi' rugojnan lëjt compniar raliduladx ree Jesucrist, cuerp ni raya'p ree loj guidxliuj guie ad zajct yayun xanyabaa lod canabee Dios. Din ni rodx ad zajct chu'n lod yu' ni ad rodxt. **51** Per rënan gagbeedi tib ni achutdzi wayagbee xt yan guial ad dugrat ree yayëjt, per dugra ree guidxaa zi'c nayajc ree, yaya'p ree cuerp ren. **52** Laan gac chi yaguejn ree trompejt ni gugojn dunuj ree guial

ma bidxin tiamp ni yarri ree loj guidxliuj guie, dxel tibrajtzi zi'ctzi chi ruchip guiaaloj bejn zian guidxaa zi'c nayajc ree. Chi guibejdx trompejt guin yaban ree bengüt dxel ad yu'tri dxej guiët reeman abi' hor zii ma bidxaa zi'c nayajc ree yan.

⁵³ Din rüjn naguiejn guidxaa cuerp ni rodः por stijb cuerp ni ad yu't dxej godx guidxaa tēë cuerp ni rëjt por stijb cuerp ni ad yu't dxej guiët. ⁵⁴ Abi' chi ma bidxaa cuerp ni rodः por stijb cuerp ni ad yu't dxej godx guidxaa tēë cuerp ni rëjt por stijb cuerp ni ad yu't dxej guiët, dxejzii naj dxej ni ma gojc cumplid ni rëb loj xtiidx Dios lod rëb: "Xt guin ma bayaaloj gojc gan loj guialgüjt." ⁵⁵ Nadxel tēë ma gojc cumplid zi'c rëb loj xtiidx Dios lod rëb: "Guialgüjt, ¿conza guial rüjn gan? ¿Conza guial rusagzil bejn?" ⁵⁶ Guialrusagzi guialgüjt naj por dol, abi' por ley ragbee bejn guial dol guin naj ni rniambee laaman. ⁵⁷ Per quixtēe dux Dad ree Dios, bén rüjn dunuj ree yudar par yaguieen ree gan por xguialgüjt Dad Jesucrist.

⁵⁸ Zeel compniar raliduladx ree Jesucrist zi'c rēnan lëjt rnin lojdi, gol guzudxi'ch ad chu' tēë luxdoodi tio'p. Guixie guixie gol been naguiejn güundi mazri xmandad Dios, din lëjt ragbee guial ad ni xlia'tzi gra ni cayüjndi par Dad Jesucrist.

16

Milia ni rdo'p par ree xbejn Dios

¹ Yan por milia ni naj guto'pidi par güundi yudar stijb ree dux compniar ree bén raliduladx ree Jesucrist, gol been zi'c gunabeen güün ree bén

[Gui'ch yaloj par ree bén Corinto 16:2xlvii](#)[Gui'ch yaloj par ree bén Corinto 16:12](#)

rliladx ree Jesucrist niz Galacia. ² Gazob dum-ingw tijb gajdi gol gule'c cintabl zi'ctzi beendi gan lén toxman, din chi guialan ad rüjntri naguiejn guido'pidi milia guin. ³ Abi' chi guialan, bén ni gucaabeeedi par gaxhalan laa reeman chigsa'n gon guin Jerusalén gaxhalan laa reeman con gui'ch ni guiëb chu naj reeman. ⁴ Abi' bal guguijan guial rüjn naguiejn gan dxel chinë'n laa reeman.

Xhienaaq naj xixgab Pab

⁵ Yaloj gadëëdan niz Macedonia dxel guialan Corinto guidganan läjt. ⁶ Wed xchej gazun con läjt. Wed guidib tiamp nayaag gazun con läjt, dxel güundi naj yudar din gan lod naj gan. ⁷ Ad rëntan gadëëdzi nejzan gaguixlon läjt, rënan gaglaan con läjt bal gunee Dios permis. ⁸ Per yan naj yaya'nan Éfeso xt lanij pentecostés, ⁹ din guie merczi yan catiëjb ree bejn cucaagdiajg reeman xtiidx Dios, abi' rulüü zien reeman chililadx laan, majsi zien gajc reeman rdxe'ch naj por zian.

¹⁰ Chi gui't Timoteo, gol been naguiejn din suman zagdxe con läjt, din lasa'gajc xmandad Dios ni cayünan cayüjnman. ¹¹ Zeel achu läjt guiniajgaa lojman, gol beenman yudar din gusnuu xnejzaman sin guial chu'man xgab, din gui'taman guie lod cabëézan laaman con los demazri ree dux compniar ree.

¹² Abi' Apolos, naj guza'c laaman liaadx din nidnëman laa reeman nitixloj reeman läjt, per ad guyëntaman ni'taman yan, per zi'tcaman guitixlojman läjt chi guneen laaman tiamp.

Diidx bigra ni bacaa Pab loj gui'ch guie

Gui'ch yaloj par ree bén Corinto 16:13xlviii Gui'ch yaloj par ree bén Corinto 16:24

¹³ Gol guzujsin gol guzujdxi'ch tëë loj ni rliladxidi Jesucrist. Gol gudaan ni gui'tzi gol guzujdxi'ch tëë. ¹⁴ Gra ni güundi gol beenan guial rëndi bejn ree.

¹⁵ Compiiar raliduladx ree Jesucrist, lëjt ragbee guial Estéfanas con xfamilaman laa reeman naj bén yaloj bililadx Jesucrist niz Acaya, ragbee tëëdi xhienaag cayüjn reeman yudar dux compniar ree bén rliladx ree Jesucrist. Zeel rnin lojdi: ¹⁶ Lasa' ree bén guin gol bazoob xtiidx reeman con gra ree bén cayüjn xmandad Dios në ree bén cayüjn yudar cayajc mandad guin.

¹⁷ Dád nix guyu luxdon chi baguaad Estéfanas guie, në Fortunato në Acaico. Din por laa reeman guza'can zi'cgajc chi za'n con gradi. ¹⁸ Laa reeman bagu' luxdon niz guie zi'c ragu' reeman luxdoodi, abi' lasa' ree bén guin gol gojp reeman respejt.

¹⁹ Gra ree compniar rliladx Jesucrist niz Asia guie rugajpdioz reeman lëjt. Abi' Aquila con lacheelaman Priscila con gra ree xbejn Cristo bén rado'p ree lidx reeman, rugajpdioz reeman lëjt, nayajc ree xbejn Cristo. ²⁰ Gra ree dux compniar ree bén rliladx ree Cristo rugajpdioz reeman lëjt, gol bagajpdioz tëë lasa'di zi'c rayal.

²¹ Naj Pab, quib naj cuca lëjtr guie ree par gugajpdiozan lëjt.

²² Bal yu' bén ad rënt dux Dad ree Jesucrist, laaman ma rayal xcasti Dios. ¡Dux Dad ree Jesucrist nayob gui'taman!

²³ Abi' dux Dad ree Jesucrist güünle' gradi. ²⁴ Zi'c nayajc ree xbejn Cristo tiblojzi rënan gradi. Amén.

Xtiidx Dios

New Testament in Zapotec, Santo Domingo Albarradas (MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
fb4ebcb8-e1f4-5bfc-b08c-f590e137d86d